

禮
記
章
句

吾師荆溪 任鈞臺先生以理學文章
負海內鉅儒偉生乎著述備賈董
之醇茂制義古文鏤版行世久已家弦
而戶頌之而尤潛心象蘊穿穴經術提
鉛握槧磨寒暑不少休裨激志會寔
能發前人之所未發蓋有唐宋以來諸
儒之長年逾六秩成雍正癸丑科進士
授職詞館

寘廟夙知其名即

名入為

皇子師震宮鶴籙禮接優隆

今天子御極後累加遷擢仕至宗人府以丞

嗣

上特下明詔選舉經學猶稱述其名以為

程式 先生雖晚遇而遭際

與學右文之盛屢荷

守達殊知信乎經明行修實至而名副者歛保
於乾隆丙辰鄉試幸出 先生門下其
時年尚髫髻於學殖淺舊願 先生之
賞譏而獎許之者特至函丈追隨契道
彌篤惜也漫游日涉值 先生留臻產
老旋心仙錄未罄親炙之私然而進溯
像型雲亭馬帳多寐依之迄今二十
餘年如一日也 先生之孫慶范及門

下士近梓其四書約旨禮記章句二
種去年冬述以尺示謹受而讀之竊
見約旨一書言簡而義該伯之哉而孔
曾思孟之意旨蓋從沈潛體味而得之
殆不愧為紫陽功臣非蒙存涉說之約
等書所可比類而謬者其章句一書
恭酌乎唐孔穎達宋朱子元吳澄及
本朝人芮城舊本列為統宗明倫故身

立政五禮論禮論集通論之目後傳來列
朝名家說禮之言間或蓋以已見表於正
是由是休之身心施之家國洵有條而不
紊矣夫仰岱集之高者鮮能窮其巔
頂涉河海之廣者鮮能究其原委保於

先生之學問淹通涵蓄亦可恣量矣猶是
耳今此二書者祇以窺見其一斑而先生
之學亦概概乎其信今而傳後者已於是

守左憲乎道範雖遠薪傳未絕循誦
遠言標忱若親承謦欬而昭然發矇者
司也述其生平而敬綴一言於幘末以敢
妄託於樞門李漢皇甫湜之倫謂足以表
第 一 六 第 籍 是 以 志 涵 源 上 有 自 三 兩 寄
乾隆四十年歲次乙未正月下泚吉林門人德保
謹跋於粵東官署

禮記章句自叙

世傳五經舊矣。然禮記固非孔子定也。孔子刪詩書定禮樂。贊周易。修春秋。四經具在。而禮獨湮沒。惜哉。漢河間獻王收孔子弟子書百三十一篇。劉向校之。亡其一。後又得孔子三朝記。明堂陰陽記。王氏史氏記。樂記共二百十四篇。戴德刪并爲八十五。戴聖又刪之。損益離合爲四十六。戴聖所刪。今名大戴禮。其合者如豐廟禮。入雜記。中坐如尸。二句。人曲禮中分者。如朝事篇。分爲朝義。聘義。曲禮。檀弓。雜記各可謂博收而慎取之矣。馬融取諸劉向。增入者分上下篇。三樂記善。次月令。稍濫。明堂位益夸。四制不知出自何人。

約大戴本命篇竄以己說而朝義復亡今所傳四十九篇
者是也鄭康成註之唐孔穎達疏之遂列諸經與孔子所
定易象詩書春秋等矣或曰儀禮經也禮記傳也此以論
冠昏飲燕射聘諸義則然他篇不可槩論或曰治天下大
法在周禮是宜經然作聖門庭闢奧若大學中庸探禮樂
本原若禮運樂記其言與易傳詩書相表裏曲禮少儀內
則尤治身治家要法非是周禮何以行哉記四十九篇言
喪祭蓋半而喪居三之一古人于此兢兢焉此意卽禮之
本也而或乃廢之謬矣月令王制閒雜秦漢要亦拔之虞

夏商周爲多傳曰禮與時宜學者苟綜所聞得聖人之意
因時進退而以道爲權虞夏可師秦漢亦可監也何必成
周漢註唐疏多附會要所援據雜而不越義蘊殊可尋宋
朱子作大學中庸章句精粹越諸儒然自是漢儒之學微
矣學者牽于所聞或飾虛辭以自遜不務會通而妄相訾
擊奚益夫聖人之禮將以宰天地順萬物其事行于班朝
蒞官之地而義皆寄諸學者誦說討辨之中學者討辨極
于微渺而後施之銖黍不爽其衡儒者之論荒而悠謬漸
浸于朝寧秦漢以逮元明非議周禮而輕變之本末失衡

輕重倒置君臣之交壞于秦父子之恩薄于漢唐爲母三年而夫婦之序廢明爲妾母服斬而適庶之分淆中乎人心沿乎風俗雖一時議政者過要亦學者講不精理不明之致也故曰禮之義明而萬事可得而理矣運幸生

聖世沐浴教澤于禮之意竊與有聞因朱子學庸章句悉取戴記條其次補其闕正其遠通其異而尤慎于喪凡有關倫紀之大而爲秦漢唐宋元明輕變者著其說俟定禮者酌取焉康熙戊戌義興釣臺任氏啓運叙

禮記章句目次

荆溪任啓運定

卷之一

大學第一

中庸第二

右二篇統宗

皆于朱子章句而鄙見附焉餘皆斷自鄙見而取諸賢足之

卷之二

內則第三

夫婦內外

父子

少儀第四

兄弟長幼

玉藻第五

君臣

賓主朋友

飲食之制

衣服之制

深衣篇并入此

右三篇明倫

卷之三

曲禮上第六

通論

成儀

起居

拜稽

奉持趨走
言語辭令

飲食
問遺

車乘
雜禮

右一篇敬身

曲禮下第七

初聘會盟

建官

柶名

諱名

卜筮

重宗廟

尊朝廷

守職死官

去國
復讐
凶荒
災變

王制第八

爵祿

巡守法職

賜諸侯

征伐

田獵

國用

經野

教選

刑罰

關市

史官

質成

優老

卷之四

月令第九

授時布政

世子記第十

教世子

立學

視學

養老

正公族

大傳第十一

學記第十二

教學

右六篇立政

卷之五

冠義第十三

嘉禮一

昏義第十四

嘉禮二

鄉飲酒義第十五

賓禮一

燕義第十六

賓禮二

投壺第十七 賓禮三

射義第十八 賓禮四

朝義第十九 賓禮五 此篇孔本逸今補

聘義第二十 賓禮六

卷之六

喪大記第二十一 凶禮

喪禮大綱

雜記第二十二 凶禮二 舊分上下篇今合

喪禮細目



喪服小記第二十三

凶禮三 服問篇并入

喪服隆殺

奔喪第二十四

凶禮四

喪禮之變

卷之七

喪義第二十五

凶禮五

檀弓之半問喪二年問問傳喪服四制等篇皆併入

檀弓上第二十六

聖門論喪及行喪禮得失

檀弓下第二十七

君卿大夫行喪禮得失

卷之八

祭法第二十八 吉禮二

天神

地祇

社稷五祀

宗廟

祭物

祭服

祭廟

還廟

祭義第二十九 吉禮二

郊義

社義

蜡義

宗廟祭義

明堂位第三十 吉禮三

祭禮之階

曾子問第三十一

五禮之變

右十九篇五禮

卷之九

禮器第三十二

郊特牲篇半入此半分入冠昏祭義

禮運第三十三

右二篇論禮

樂記第三十四

樂本第一

樂論第二

樂體第三

樂精第四

樂施第五

樂形第六

樂法象第七

樂化第八

賓牟賈問樂第九

魏文侯問樂第十

子貢問樂第十一

原分十一篇皇氏合

右一篇論樂

卷之十

表記第三十五

坊記第三十六

緇衣第三十七

哀公問第三十八

仲尼燕居第三十九

孔子閒居第四十

經解第四十一

儒行第四十二

右八篇通論

禮記章句目次

畢

門人德
保編次

禮記章句類例

禮記劉向戴德戴聖馬融互有損益篇次必多違異今所傳者唐疏孔穎達本也鄭康成註儀禮序次一從劉向貴賤不相踰吉凶不相雜獨禮記殊紛錯今孔疏稱劉向內則屬子法文王世子屬世子法曲禮少儀王制禮器玉藻深衣屬制度月令明堂位屬明堂陰陽投壺屬吉事冠昏鄉飲燕射聘義屬吉禮喪大記小記雜記奔喪問喪三年問問傳服問屬喪祭法祭統祭義郊特牲屬祭樂記屬樂四制篇別錄所無餘十五篇屬通論劉次如是鄭何故違

之聞南北分治時梁有皇甫侃齊有熊安生各傳禮業今熊氏所傳大學與孔本絕異孔疏以皇本爲據而于樂記言鄭目是樂施三樂言四樂禮五今以樂禮爲第三或記家別起意趣是今固非鄭次疑皇變鄭目而孔因之也唐魏徵病其祿亂定爲類禮二十篇其書世所罕覩宋程子刪定未了其書亦復不傳朱子採入儀禮經傳多所考定而喪祭二禮續諸黃氏其於禮記不爲完書元吳澄三禮叙錄別投壺奔喪補儀禮之經冠昏鄉飲射燕聘義爲儀禮之傳記之存者僅三十有六篇爲通禮者九曲禮少儀內則通記大小儀文而

漢衣附焉。月令王制玉藻專記國家制度而文王世子明堂位附焉。為喪禮者十有一喪。大記雜記小記服問檀弓。曾子問記喪而大傳問傳問喪三年問喪服四制則喪之義也。為祭禮者四。祭法記祭而郊特牲祭義祭統則祭之義也。為通論者十二。禮運禮器經解一類。哀公問仲尼燕居孔子開居一類。坊記表記緇衣一類。儒行自為一類。學記樂記文將雅則而考註則又取雜記之毀廟列諸逸經。故以為一書之終。

增入服義喪大記喪義祭法祭義五篇。小記服問大傳合為服義四制問傳

三年問問喪合為喪義雜記及檀弓之半。分入此二篇。禮運郊特牲祭統多人祭義曾子問散入各義。又改

禮記之名曰曲禮。使與儀禮匹。而以內則少儀曲禮諸篇

隸之。凡君禮入盛德第一。臣禮入人官第二。子禮入立孝

第三。女婦事父母舅姑入內則第四。少事長入少儀

第五。揖讓進退為表記第六。學記第七。樂記第八。凡八篇

楊士奇謂此書吳邑晏堂所定羅倫謂名篇取義非後人

所及疑公定篇目未成書臨沒授意子孫後人因竄入成之也其所絀者蓋多矣國初

芮城深陽人字巖尹隱士謂儀禮所闕者多即補之亦不為完書而

禮記反成殘缺不如兩書互備因取禮記條分規合定為

三十八篇考其功勤過于吳氏萬名禮記通識其前後目次詳各篇題下然與

愚意又有異同者復酌之朱子參之吳氏更其後先補其

闕略定為四十二篇

大學本小戴之第四十二中庸本小戴之第三十自宋仁

宗以此兩篇賜新第王堯臣王拱辰等天聖五年以中庸賜新第王堯臣等

八年以大學賜新第王拱辰等兩篇特重迭加講究至朱子作為章句聖

學之門庭闢與粲然大明遂與論孟竝稱四子吳澄謂既與論孟竝列卽不當復廁之禮書愚謂二篇禮記之心胥也離心胥于骨膚則不特內則少儀王制月令及冠昏喪祭皆爲徒法卽大學所格何物中庸所擇何善修身齊家之則爲天下國家之經不皆空言而無實與故合則兩得離則兩失今仍合之冠二篇于首

孔本曲禮第一凶本冠義第一朱子嘗稱內則爲古經曲禮爲禮經之記冠昏諸義爲禮經之傳夫禮必有經而後有記有記而後有傳且吉凶賓嘉禮之目貌言視聽禮之

儀親義序別信禮之寶朱子小學亦先明倫故以內則爲諸禮之首

內則原篇先父子今先夫婦者易曰有夫婦然後有父子本篇亦曰禮始于謹夫婦也

少儀一篇鄭孔以爲細小威儀朱子以爲少者事長之節其附入者雜耳因釐其雜亂取他篇之言弟者補之今斷從朱子次內則言孝之後

玉藻一篇多言君臣朋友相接之儀朱子分臣禮及士相見禮今但就本篇差次之先君臣次賓主朋友五倫之禮

亦略備矣。飲食原屬內則。今按中饋固婦人之職。而子之於父。有視膳。臣之于君。幼之於長。有侍食。主之于賓。有進食。故移而置之于後。且與言衣服者相次也。玉藻言冕服及深衣。而深衣未詳。故并以深衣篇入之。至所云邪辟之心。無自入。則又敬身之要也。

曲禮二篇。言委曲威儀。五倫五禮。無所不有。今既別其言。五倫者。入上三篇。因取上三篇。言雜儀者。屬之。此篇又于其中。別治身者。爲上。王事國事。爲下。先治己。後治人。程子所謂有天德。然後有王道。有睢麟之意。然後可行。周官之

法度也

王制成于漢月令作于秦皆采虞夏商周之制而稍更變之且雜以時制雖曰未純要亦近古所言皆王朝禮故次曲禮下篇

王制月令雖出秦漢體裁猶近于經世子記以下則純乎傳矣世子記言教世子正公族而大傳亦言敬宗睦族世子記言立學養老而學記亦言嚴師敬學故遞次之以上十篇內而治己外而治人細而起君食息之常大而體國經野陳常藝極之則王道規模庶幾略具

禮記惟軍禮無專篇或古人尚德之意然車乘之禮田獵之法征伐之川散見曲禮王制月令諸篇可參考也冠昏嘉禮燕飲投壺射朝聘皆賓禮喪凶禮祭吉禮節文未備大體具焉

冠昏家禮飲鄉禮射方鄉射有大射家國通禮燕國禮朝聘有于王有于侯甸與天下通禮禮自家而國而天下故又以爲序焉

投壺古之逸經射之細也且亦飲燕所用故附之飲燕之後射義之前

前言
三
朝義聘義大戴本爲一篇名曰朝事小戴分之爲二今本
有聘無朝不知何時逸之也朱子採入儀禮文視大戴爲
略吳氏改爲覲義文稍詳而與先王父錄本又小有異同
今參合之以補其闕

士相見義公食大夫義皆劉敞撰補因朱子取之故亦附
錄因非小戴所有故不列目次中

戴記于喪最詳喪大記一篇君大夫士禮皆在雖不及天
子而大體具焉故以爲喪禮之正經雜記多喪禮之節目
故去其雜者而列大記之次喪服小記則喪服之義也奔

喪則喪禮之變也。故遞次之而取他篇之言喪者各以類附。

喪義一篇原目無其名。今按檀弓所撮有與祭義文絕類者。必皆古禮之義疏。今合爲一章。若問喪三年間問傳喪服四制四篇皆明喪禮隆殺異同之義。故倣吳氏合之爲喪義篇。以從冠昏諸篇之例。

檀弓所載多後人行喪禮之得失。故列之喪禮之末。

祭法一篇大約本國語展禽論祀爰居而小變之其闕略殊甚。今取他篇言祭者悉合之。以天地社稷五祀人鬼略

條其次

郊社之義略見郊特牲祭義一篇惟言廟祭耳今取合之亦以郊社蜡廟條其次祭義言廟祭甚精微祭統言廟祭甚廣大亦并取合之古之君子事親如事天事天如事親廟祭之義明而郊社之義亦可想也

明堂位篇祭器略具而魯之郊禘亦祭之變也故列之祭禮之末

曾子問于冠昏期聘喪祭之變無所不周劉向僅屬諸喪非也故斷爲五禮之卒篇

禮器禮運禮之總論也郊特牲本禮器之下篇先總論後分論據斷處首數字立名若士虞之既夕耳今既取其言冠昏祭者入各篇餘仍合之禮器

禮樂異事而同源后夔典樂屬於伯夷周官樂正統于宗伯樂記本別一書而劉氏馬氏合之禮記亦當禮至大備大順則樂興焉故次之禮器禮運之下周子所謂理然後和禮先而樂後也

天命道之原一貫道之極先大學中庸而後內則少儀諸禮乃綱舉而目張及樂記之同節同和仍殊塗而同歸矣

此所謂一實萬分萬一各正而終於是萬爲一也其餘八篇亦出七十子之徒以不專言禮故附之後而表記坊記緇衣一類哀公問仲尼燕居孔子閒居一類經解備行一類略倣吳氏而儒行最駁特殿之

禮記名爲小戴迭經諸儒竄易實非小戴之舊故亡失亦多如朝義則逸其篇內則妾事夫人則逸其節檀弓吾將安仗則逸其句今凡見他書引述有明徵者悉爲補定若非本篇所逸如王后生子及名子不以首等禮則但附之小註不敢攙入正文

曲禮少儀雜記小記等篇皆記者臨時掇取不盡爲差次則條目不通。養老禮見內則又見王制樂化篇見樂記又見祭義實係重出刪一爲當其餘各自成章不便割裂或辭同意異不宜刪合者俱仍其舊間有附入一二章參合一二語者亦以其類似云。

大戴禮孔氏家語汲冢書荀子呂氏春秋淮南鴻烈解劉向說苑新序唐月令等書非此因彼則彼襲此字句異同悉資互訂。餘若伏生書大傳韓嬰詩外傳董子春秋繁露孔叢子陸賈新語賈誼保傅傳白虎通義蔡邕獨斷等書

大率與二載後先並出凡有關涉悉資証佐焉

古註鄭王二家爭勝孔爲鄭左袒王是以不傳然卽孔疏駁論中王實有理勝者不可誣也他如皇熊諸家見于註疏方陳應劭見於集說葉時禮經會元姚舜牧疑問湯道衡新義郝敬通解徐師曾集註徐統學讀禮通陸隴其讀禮志疑萬斯大學禮質疑毛奇齡經問等書愚反復參互或始睽而後合或昔信而今疑或百是而一非或兩存而交備總求揆之天理而當質之人情而安考之古而有據推之後而可行非敢求異前人庶幾可供來請云爾其餘

他書註說若杜預韋昭郭璞邢昺高誘顏師古張守節等
文集自蔡邕韓愈歐陽修迄本朝汪琬顧炎武等字書
自說文韻補玉字典等雜書如山經水註醫疏麻法農書
凡可採証皆掇取焉

禮記章句類例

終

禮記卷一之一

子朱子章句

任

大學

孔本第四十二朱子別為章句又入學禮第一

八歲或十歲則入小學先教之以洒掃應對進退之

節禮樂射御書數之文及其十有五年則天子之元

子衆子即入於成均諸侯卿大夫元士之子各入于

郊學亦有選而即入成均者民之俊秀入于黨之序

遂之序以漸升而入於郊學焉天子六鄉所升及諸

侯郊學所貢皆入天子四郊之學大司徒掌之又三

年拔其尤則入于成均而與天子之元子衆子齒此

其人皆有國家之責治平之任則所為誠正修身以

立其本者愈不可不講故以大學名篇大學有石經

本見鄭覽古言有小戴本見今禮記有二程子考定

本見二程全書伯子叔子亦具有朱子考定本今所

列為四書者是也宋儒若陸氏明儒若王氏本朝若

李文貞皆謂不如小戴本愚謂禮記自劉德一百二

十一篇後經二戴刪并皇南燕北眉次各殊營之終

禮記大學卷一之一

一

古此地而疆界屢更就朱子觀自覺井井運註禮記
 本因朱子章句故于朱註槩從原本本間有蠶測附之
 圈外云○朱子曰子程子曰大學孔氏之遺書而初
 學入德之門也于今可見古人為學次第者獨賴此
 篇之存而論孟次之學者必由是而學焉則庶乎其
 不差矣又曰秦漢以來儒者既失其傳故其舊文舛
 錯殊甚而訓說亦多不能得其微意今推本程氏緒
 正之仍別為章句讀者宜盡心焉則聖賢之學可漸
 而進矣

大學之道在明明德在親民在止於至善

程子曰親當作新運疑如字○

朱子曰大學者大人之學也明明之也明德者人之所得
 乎天而虛靈不昧以具眾理而應萬事者也但為氣稟所
 拘人欲所蔽則有時而昏然其本體之明則有未嘗息者
 故學者當因其所發而遂明之以復其初也新者革其舊
 之謂也言既自明其明德又當推以及人使之亦有以去
 其舊染之汚也止者必至于是而不遷之意至善則事理

當然之極也言明明德新民皆當止于至善之地而不遷蓋必其有以盡夫天理之極而無一毫人欲之私也此三者大學之綱領也○運謂親親之也盡父母斯民之道老吾老以及人之老幼吾幼以及人之幼使之各有以遂其生復其性也程子據作新民改親為新但傳言親賢樂利言慈者所以使眾言民之父母似親義較多蓋親該養與教新則但知止而后有定定而后能靜靜而后能安安而

后能慮慮而后能得

后與後同後放此○止者所當止之地即至善之所在也知之則志有定

向靜謂心不妄動安謂所處而安慮謂處事精詳得謂其所止○運謂知止未能至至善之域而望以為歸也蓋學莫先于立志以堯舜之聖為必可為以唐虞之治為必可復志之所向行必赴之隨其身之所居事之所接無不于志之所向者而求至焉則能定者意日趨於誠靜者心日趨于正安者身日趨于修而凡家事國事所以處之者必日進于精詳定靜安慮有常而物有本末事有終始知所日上者其進進又自不同也

物有本末事有終始知所

先後則近道矣

明德為本新民為末知止為始能得為終本始所先末終所後此結上文兩節之意

○運謂物即格物之物人之生也萬物皆備于我天下無性外之物而就物而論則有本焉末焉物有本末則物物之事必有終焉始焉于此而不審其先後之序必古之欲有維施而不孫者以起條目必先致知格物之意

明明德於天下者先治其國欲治其國者先齊其家欲齊

其家者先修其身欲修其身者先正其心欲正其心者先

誠其意欲誠其意者先致其知致知在格物治國之治平聲後凡用力

理之者放此○明明德于天下者使天下之人皆有以明其明德也心者身之所主也誠實也意者心之所發也實其心之所發欲其必自慊而無自欺也致推極也知猶誠也推極言之知識欲其所知無不盡也格至也物猶事也窮至事物之理欲其極處無不到也此八者大學之條目也○謹謂明明德于天下者萬物皆備于我不舉天下而

平之不足以盡吾明明德之量也然天下之本在國國之
 本在家家之本在身物有本末固如此此之不可不知也
 知其在家則知遠之近矣知其在身則知風之自矣而身
 之主推心之心之發為意心微而意已向于顯此其微之顯
 者尤不可不知也欲致其知在于格物管之木焉指其根
 謂之木指其枝葉謂之末本一而末萬要非二物也自本
 至末一生理之所貫注也生理之存為心生理之流為意
 格也者自本至末為大為小為近為遠各見其情各識其
 理而後可各如其分以付之無所不當亦無所不貫故必
 格物然後能盡物天下之物盡而後吾萬物皆備之性盡
 也故欲明明德於天下必自格物始也誠意正心修身明
 明德之事齊家治國平天下新民之事先後之中又各有
 先後焉欲知其事之先後物格而后知至知至而后意誠
 必在格其物之本末也

意誠而后心正心正而后身修身修而后家齊家齊而后

國治國治而后天下平
國治之治去聲後凡已理者放此
 物格者物理之極處無不到也

知至者吾心之所知無不盡也知既盡則意可得而實矣
 意既實則心可得而正矣修身以上明明德之事也齊家
 以下新民之事也物格知至則知所止矣意誠以下則皆
 得所止之序也。運謂此節覆申上文物之本末知之既
 明則事之始自天子以至於庶人豈是皆以修身為本
 終自得其序自天子以至於庶人豈是皆以修身為本
 一切也正心以上皆所以修身也齊家以下則舉此而錯
 之耳。或言天子乃有天下大夫士庶止有家耳本同而
 末究異。運謂諸侯之子世其國即與天子共治天下大夫
 士子繼其家即與君共治其國而凡民俊入于大學皆將
 有卿大夫之任即皆有治國乎天下之責堯舜君民之事
 業豈能一時猝辦哉故必誠正以仁其身使根本之地生
 理具足然後自家而國而天下其本亂而末治者否矣其
 生意周流枝葉茂密無非仁也其本亂而末治者否矣其
 所厚者薄而其所薄者厚未之有也本謂身也所厚謂家也此兩節結上文兩
 節之意。運謂老吾老以及人之老幼吾幼以及人之幼
 家國天下。一仁之所自流也。不仁其身根之生理盡矣所

厚者薄幹且枯也而欲枝葉之茂豈可得哉○按古本下
接此謂知本此謂知之至也李氏光地曰知天下國家以
身為本則知身心不可以放縱苟且自私知本亂而末不
治則知治天下國家不可以智力權數相取此謂知本結
所先後意此謂知之至也結物格知至意必知本而後為
知之至舍知本而言知至非古人之知矣李說與朱子異
然必知本而後為知至所謂一以貫之非多學而識之
知也其義正與朱子說相發明但如此則不分經傳矣

右經一章蓋孔子之言而曾子述之

凡二百五字

其傳十

章則會子之意而門人記之也

凡千五百四十六字

舊本頗

有錯簡今因程子所定而更考經文別為序次如

左

凡傳文雜引經傳若無統紀然文理接續血脉貫通深淺始終至為精密熟讀詳味久當見之

今不盡釋也○或謂孔子之言曾子之意無據按隋志言漢河間獻王得仲尼弟子書百三十一篇

舊稱孔子歿後七十子共撰所聞為記而大學在焉誠意章明有曾子曰句賈達言孔伋窮居子宋懼先聖之學不明作大學以經之中庸以釋之則子思正曾子之門人由曾子而上溯孔子無疑也

康誥曰克明德康誥周書大甲曰顧諟天之明命大讀泰

字之大甲商書顧謂常日在之也諛猶此也天之明命即

天之所以與我而我之所以為德者也常日在之則無時

不明矣運謂天者萬物之統也我之明德命于天人之

明德亦命于天即我之先知覺後知先覺覺後覺亦命于

天知天命之可畏則明親之功自有不能已者而滿乎

其量終身由之不能自必其至矣此傳釋經之特筆帝

典曰克明峻德峻書作俊帝典皆自明也皆自明也結所引書皆

之意運接人就不有身身就不有心心就不具

此明德而能自明者宰寡可不愧哉可不奮哉

石傳之首章釋明明德此通下三章至止於信者

本誤在沒世不忘也之下

湯之盤銘曰苟日新日日新又日新

盤沐浴之器也銘名其器以自警之辭也

故銘其盤言誠能一日有以滌其舊染之汚而自新則當

因其已新者而日日新之又日新之不可畧有間斷也

運按人皆有明德而不能自明皆習染累之也承上文切

指明明德之要蓋不待新之而原無汚者康誥曰作新民

生安之聖人學利以下則非是莫由矣

故之無之之謂作言振起其自新之民也○此乃由明德

以及親民已欲其新則親民者亦望其新且民共有此明

德亦孰不願自新者而忽而醒者俄而昧激而奮者隨而

怠志不堅力不繼氣不足也放勳曰勞之來之匡之直之

輔之翼之使自得之又從而詩曰周雖舊邦其命惟新

振德之作之之法放勳備矣詩曰周雖舊邦其命惟新

雅文王之篇言周國雖舊至于文王能新其德以及於民

而始受天命也○此乃言明德親民之止于至善命天之

明命也○而誕天之明命則其命新矣天命之性與天無間

萬物備焉故學不至盡物之性不可言盡性也不至于盡

性遠天亦不可言盡人也自天子以至於庶人其位則異其學則異素其位而行能盡其性皆達天也仲尼學不厭日新又新也故不倣作新也下學上達知我其天新命也百天子以至於庶人一也李文貞曰命賦于生初以稟秉命于生後以明威言降于初無不善應乎後無不公仰有氣祭之不同氣數之未定而聖賢于此盡其理成其能天地亦于斯是故君子無所不用其極自新新民皆欲通其變神其化以起下文

右傳之二章釋新民

詩云邦畿千里惟民所止詩商頌名鳥之篇邦畿王者之都也止居也言物各有所當止

之處也。明詩云緝蠻黃鳥止于丘隅子曰於止知其所至善之當止緝蠻黃鳥止于丘隅子曰於止知其所

進可以人而不如鳥乎緝蠻黃鳥止于丘隅子曰於止知其所

孔子論詩之辭善人當知所當止
之處也。明欲得止必先知止。詩云穆穆文王於緝熙

敬止為人君止於仁為人臣止於敬為人子止於孝為人

父止於慈與人交止於信。於緝之於首鳥。詩文王之

緝，緝，緝也。熙，光明也。敬，止言其無不敬而安所止也。引此

而言聖人之止無非至善。五者乃其目之大者也。學者于

此究其精微之蘊而又推類以盡其餘則于天下之事皆

有以知其所以止而無疑矣。明定靜安之至乃能慮而得

也。靜者定靜安之至。緝熙者不待思慮而明無不照。敬

止者不待執事而無不克。物各得其止也。蓋初學之

定志向也。學而上或德定而無定矣。初學之靜心不妄動

至下成德靜而無靜矣。定而無定靜而無靜所謂安止也

矣。故曰定靜安慮有常而曰上者進進不同也。詩云瞻彼

淇澳采芣芣有斐君子如切如磋如琢如磨瑟兮僖兮

赫兮喧兮有斐君子終不可諠兮如切如磋者道學也如

琢如磨者自修也瑟兮僴兮者恂慄也赫兮喧兮者威儀

也有斐君子終不可諠兮者道盛德至善民之不能忘也

濶於六反葉詩作絲待叶阿爾下版反喧詩作啞諠詩作

諠並况晚反矧鄭峻○詩衛風淇澳之篇淇水名澳隈也

時倚美盛貌興也斐文貌切以刀鋸琢以椎擊皆裁物使

成形質也磋以錐錫磨以沙石皆治物使其滑澤也治骨

角者既切而復磋之治玉石者既琢而復磨之皆言其治

之有緒而益致其精也瑟嚴密之貌僴武毅之貌赫宣宣

皆盛大之貌諠忘也道言也學謂講習討論之事自修者

省察克治之功恂慄戰懼也威可畏也儀可象也引詩而

釋之以明明明德者之止于至善道學自修言其所以得

之之由恂慄威儀言其德容表裏之盛卒乃指其實而嘆

美之也○運謂學以明其理格致之功知之事也修以踐

其實誠意之功行之事也恂誠深敬也存誠主敬則心正

矣有威可畏有儀可象則身修矣至于民不能忘則家齊國治而天下平可知蓋明明德之至善節有以統乎新民也朱子此註亦最精密蓋學必講乃明講者求知之始既講之又習之則溫故而知新矣討又尋究之惟恐信者或有非論又辨議之必求至是之歸也講習討論熟于平日省察又慎于當幾克去私之勇治去之淨盡也廢以防其大害以察于微則物欲不得乘我于瘳投我于墮矣而又武以任其重毅以致其遠希聖希天純亦不已也誠于中必形于外如而宣德而著光十上下其詩云於戲前王盛灼于四方其大也德之盛而業斯大矣詩云於戲前王不忘君子賢其賢而親其親小人樂其樂而利其利此以沒世不忘也於戲音烏呼樂音洛後凡既得而喜悅放此也君子謂其後賢後王小人謂後民也此言前王所以新民者止于至善德使天下後世無一物不得其所所以既沒世而人思慕之愈久而不忘也○運謂其賢者典則之貽其親者功德之庇其樂者親避之風其利者農桑之職

前王往矣而其親其賢其樂其利猶存使天下後世皆有以正其德利其用厚其生而老老幼幼無不各得其所此因上不忘而言見親民之至善不外乎明德必如此而後為明明德于天下也。朱子曰此兩節咏嘆注洗意味深長當熟玩之

右傳之三章釋止於至善

此章內自引淇澳詩舊本誤在誠意章下

子曰聽訟吾猶人也必也使無訟乎無情者不得盡其辭

大畏民志此謂知本

猶人不異于人也情實也引夫子之言而言聖人能使人無實之人不敢盡

其虛誕之辭蓋我之明德既明自然有以畏服民之心志故訟不待聽而自無也觀于此言可以知本末之先後矣

右傳之四章釋本末

此章舊本誤在止于信下

此謂知本

程子曰此文也

此謂知之至也

此句之上別有文此特其結語耳

右傳之五章蓋釋格物致知之義而今亡矣

此章舊本通下

章誤在經文下 閒嘗竊取程子之意以補之曰所謂致知在

格物者言欲致吾之知在卽物而窮其理也蓋人心

之靈莫不有知而天下之物莫不有理惟於理有未

窮故其知有不盡也是以大學始教必使學者卽凡

天下之物莫不因其已知之理而益窮之以求至乎

其極至於用力之久而一旦豁然貫通焉則衆物之

表裏精粗無不到而吾心之全體大用無不明矣此

謂物格此謂知之至也

通謂有本而後有末者物理自然之序先立其本而後達

乎末者亦學者當然之序也所性之理仁義禮智而
 仁其本也行仁之事親親仁民愛物而親親其本也
 孩提之童無不知愛其親所謂人心之靈莫不有知
 知即智愛即仁此貞下起元之初也由是昏有定晨
 有省仁至而禮自生在親寒燥問衣燠寒慶其宜者
 仁至而義自生于此一失其則即于孝未盡所謂惟
 于理有未窮故其知有不盡學者當因已知之理而
 益窮之以求至于其極者也夫人之生有五倫焉有
 五事焉分殊理一相為經緯故能孝者于兄弟必友
 君必忠友必信氣必和容必婉聽必恭視必下手舞
 足蹈而不知者吾老以及人之老親親者必仁民新
 木殺獸皆以時親親者必愛物足于此即通乎彼自
 本至末一以貫之無非仁也格乎此乃可謂衆物之
 表裏精粗無不到知至此乃可謂吾心之全體大用
 無不明故曰此謂知本此謂知之至也不然屑屑于
 魚魚草木沾沾于訓詁詞章逐其末忘其本此所謂
 玩物喪志者也豈格物之謂哉後世詆訾朱子者多
 以此為口實愚故就朱子而申之以明朱子所謂格

物原非逐末
而忘本也

所謂誠其意者毋自欺也如惡惡臭如好好色此之謂自

謙故君子必慎其獨也

毋音無惡奸上二字去聲人心之
愛憎下二字如字在物之美惡後

俱放此謙依鄭讀謙○誠其意者自修之首也毋者禁止

之辭自欺云者知為善以去惡而心之所發有未實也謙

快也足也獨者人所不知而已所獨知之地也言欲自修

者知為善以去其惡則當實用其力而禁止其自欺使其

惡惡則如惡惡臭好善則如好好色皆務決去而求必得

之以自快足子已不可徒苟且以徇外而為人也然其實

與不實蓋有他人所不及知而已獨知之者故必謹之于

此以審其幾焉○運謂自欺云者不惟知惡可惡善可愛

而隱假飾美與夫頹惰苟且之為欺也有為而為已欺于

始約而為泰亦欺于終篤信前人不証諸已信心而往物

理有違即無欺亦欺也然此欺者密而自考原無不知故

曰莫見乎隱莫顯乎微君子慎獨其要全在于此意外無

獨心外無意正心先誠意提其要也誠
意必謹獨決其幾也又釋經之特筆

小人閒居為不善

無所不至見君子而後厭然揜其不善而著其善人之視

已如見其肺肝然則何益矣此謂誠於中形於外故君子

必慎其獨也

閒音閑厭鄭讀彙○閒居獨處也厭然消沮
閉藏之貌此言小人陰為不善而陽欲揜之

則是非不知善之當為與惡之當去也但不能實用其力

以至此耳然欲揜其惡而卒不可揜欲詐為善而卒不可

詐則亦鮮益之有哉此君子所以重以為戒而必謹其獨

也○運謂君子之學毋自欺為要人即可欺己之獨知不

可欺也况乎人曾子曰十目所視十手所指其嚴乎引此

亦終不可欺也以明

上文之意言雖幽獨之中而其善惡之不可揜如此可畏

之甚也○運按大學首曾子之意而于此獨標曾子曰明

曾子生平得力處在此慎獨喫緊為人處亦在此慎獨子

思愛之故中庸言戒慎恐懼亦特標其要于慎獨焉子指

目視在己形而所照所視者正此
意方動也獨中自照信凜凜矣

富潤屋德潤身心廣體

胖故君子必誠其意

屋矣德則能潤身矣故心無愧作則
胖安舒也言富則能潤

廣大寬平而體常舒泰德之潤身者然也蓋善之實于中
而形于外者如此故又言此以結之運謂誠正修之功
備而後德成心廣者由意以達心體胖者由心以達身而
心之廣未有不由心之至小出也密以察之不留一毫之
愧怍而後不愧怍之境出至仁義禮智根于心然後胖而
益昔四體不言而喻夫是之謂心廣體胖而要必自誠其
意始故君子必誠其意誠而明明德之本立親
民之本亦立矣故曰天德王道其要在乎謹獨

右傳之六章釋誠意

經曰欲誠其意先致其知又曰
知至而后意誠蓋心體之明有

所未盡則其所發必有不能實用其力而苟焉以
自欺者然或已明而不謹乎此則其所明又非已
有而無以為進德之基故此章之旨必承上章而
通考之然後有以見其用力之始終其序不可亂

而功不可闕如此云○運後皇侃所傳職記此章
下次淇澳二節次康誥至止於信十一節次聽訟
節明儒所力爭當從古本者也就古本之序觀之
學修相輝威儀承德潤身言明明德之至善至于
如此親賢樂利承民不能忘言明明德于天下其
親民之至善至于如此克明德四節承明明德之
至善盤銘四節承明明德于天下親民之至善而
申言之聽訟一節覆言親民必本于明明德而仍
以此謂知本結之其皆係之誠意章者見天德王
道其要在謹獨卽中庸以達德行達道爲天下
國家有九經皆先立乎誠之義也熊安所傳則此
謂知本二句在其本亂節下而聽訟節卽次其下
以申此謂知本之義而康誥以下及淇澳二節皆
在篇終以三綱起以三綱結然則古本與朱子本
節次雖殊要其義
原未嘗不
矣

所謂修身在正其心者身有所忿懣則不得其正有所恐

擢則不得其正有所好樂則不得其正有所憂患則不得

其正程子曰身有之身當作心李如字樂音敬凡未得而

是四者皆心之用而人所不能無者然一有之而不能察

則欲動情勝而其用之所行或不能不失其正矣李又

貞曰忿憤四者心之發乎身也心失其正則身之容貌顏

色辭氣亦因而不得其正通謂四者有動乎中必形乎外

志壹之動氣有觸于外亦感其中氣壹之動志本支不口

心有而直曰身有身之有此皆心之不得正通推之而

見身心之切心不在焉視而不見聽而不聞食而不知其

味心有不存則無以檢其身是以君子必察乎此而敬以

順推之石經下有頤淵問仁子曰非禮勿視非禮勿聽非

禮勿言非禮勿動二十二字蓋心有動而逐物者有所在

而不在也有靜而坐忘者無所在而亦不在也惟敬以直

聽言動者身勿之者心審其幾于察密其幾于養養之此
至于純久則動而無動靜而無靜無在而亦無不在矣此
謂修身在正其心

右傳之七章釋正心修身

此亦承上章以起下章蓋

所以能存是心以檢其身然或但知誠意而不能
審察此心之存否則又無以直內而修身也○通
按朱子言序不可亂功不可闕詆訾朱子者謂必
知盡天下之物而後誠意則終身無誠意之日謂
誠意正心逐段做如何能一以貫之愚謂知以
聞行之先行又闕知之境不知無以為誠而離意
亦無以為知心之見處為意而誠之乃曰真知皆
之道焉見一步行一步所見又進一步知日進則
養日情而所誠亦日異而歲不同心正身修誠于
已家齊國治天下平誠于物故曰知至至之知終
終之無非知也天德王道其要在謹獨無非誠
也中庸止言誠身大學不言心何以正身何以修

而于平天下惟言先慎乎德然則何以知何
以行亦惟于此誠之者自精之日熟之而已

所謂齊其家在修其身者人之其所親愛而辟焉之其所
賤惡而辟焉之其所畏敬而辟焉之其所哀矜而辟焉之
其所放惰而辟焉故好而知其惡惡而知其美者天下鮮
矣辟讀僻放讀傲鮮豈何○人謂衆人之終於也辟猶偏
也力者在人本有當然之則然常人之情惟其所向而
不加察焉則必陷于一偏而身不修矣○運謂愛之惡之
者心而行之者身被之者家極言身心與家之相關也
故諺有之曰人莫知其子之惡莫知其苗之碩碩叶時若
反○諺俗
語也溺愛者不明貪得者無厭是此謂身不修不可以齊
則偏之爲害而家之所以不齊也

其家

右傳之八章釋修身齊家

運謂物有本末修身為本故所好所惡之及于人者

末也如惡臭如好好色必自慊而毋自欺者本也
好而知其惡惡而知其美乃當其則而不差而
要必自清其好惡之源始彼辟于好惡者豈不謂
心之所發當如是誠哉惟物之不格故知有不
而所謂誠者亦非也然則心何以正身何以修亦
惟曰致知格物以誠其意而已故人目之序雖有
後先而要其兼修交進者原不分異事異時也

所謂治國必先齊其家者其家不可教而能教人者無之

故君子不出家而成教於國身修則家可教矣○不出家而成理有所通化有自起也

孝者所以事君也弟者所以事長也慈者所以使眾也弟

通弟子之弟則上聲長上聲後俱族此○孝弟慈所以修身而教於家者也然而國之所以事君事長使眾之道示

外乎此此所以宋齊於上而教成於下也。先以理有所通言之。康誥曰如保赤子心誠

求之雖不中不遠矣未有學養子而后嫁者也。中去聲凡中之故此

○此引書而釋之又明立教之本不似斯為在識其端而推廣之耳。孝弟慈皆性而具故無不誠李文貞謂能事

君長乃能使眾與中庸一家仁一國興仁一家讓一國興

獲上治民同義亦通

讓一人貪戾一國作亂其機如此此謂一言僨事一人定

國。僨音奮。一人謂君也機發動所由也僨覆敗也此言教成於國之效。乃以化有自起明之。堯舜帥

天下以仁而民從之桀紂帥天下以暴而民從之其所令

反其所好而民不從是故君子有諸已而后求諸人無諸

已而后非諸人所藏乎身不怨而能喻諸人者未之有也

已而后非諸人所藏乎身不怨而能喻諸人者未之有也

此又承上文一人定國而言有善於已然後可以貴人之善無惡於已然後可以正人之惡皆推已以及人所謂慈也不如是則所令反其所好而民不從矣喻曉也○以堯舜証仁讓桀紂証貪民恕者心之用忠其本也能忠則誠正以修其身而家可教矣君子有治國之責固不能不非諸人求諸人而不誠正以修身則不忠而亦無以為恕矣故治國在齊其家通結詩云桃之夭夭其葉蓁蓁之子于

歸宜其家人宜其家人而后可以教國人詩月南桃夭篇

蓁美盛貌興也之子猶言是子此指女子詩云宜兄宜弟之嫁者而言也婦人謂嫁曰歸宜猶善也

宜兄宜弟而后可以教國人詩小雅詩云其儀不忒正是

四國其為父子兄弟足法而后民法之也詩曹風鳩鳴此

謂治國在齊其家此三引詩皆以咏嘆上文之事而又結之如此其味深長最宜潛玩

石傳之九章釋齊家治國

所謂平天下在治其國者上老老而民興孝上長長而民

興弟上恤孤而民不倍是以君子有絜矩之道也

倍悖通絜胡結

反○老老所謂老吾老也興謂有所感發而興起也孤者幼而無父之稱絜度也矩所以為方也言此三者上行下效定下影響所謂家齊而國治也亦可以見人心之所同而不可使有一夫之不獲矣是以君子必當因其所同推以度物使彼我之間各得分願則上下四旁均齊方正而天下平矣○通謂平天下之道不外遂其生復其性兩端孝弟慈之理民性所自有也上以身先之而民自感發而興起矣然動其心非解動而遂其心為難老有所終壯有所用幼有所長寡寡孤獨廢疾皆有所養使之各遂其生而各遂其孝弟慈之願是百姓之以仁遂也非絜矩為德焉備皆此平上章言恕此言絜矩所惡於上毋以使下所

惡於下毋以事上所惡於前毋以先後所惡於後毋以從前所惡於右毋以交於左所惡於左毋以交於右此之謂絜矩之道先夫聲曰此覆解上文絜矩二字之義如不欲以此無禮使之不欲下之不忠於我則必以此度下之心而亦不放而亦不敢以此不忠事之至于前後左右無不皆然則身之所處上下四旁長短廣狹彼此如一而無不方矣彼同有是心而興起焉者又豈有一夫之不獲哉所操者約而所及者廣此平天下之要道也故章內之意皆自此推之詩云樂只君子民之父母民之所好好之民之所惡惡之此之謂民之父母詩小雅南

篇只語助辭言能絜矩而以民心為已詩云節彼南山維石巖巖赫赫師尹民具爾瞻有國者不可以不慎辟則為

天下僂矣

節請截○詩小雅節南山之篇節截然高大貌

人所瞻仰不可不謹若不能繫矩而好惡徇于一己之偏

則身就國亡為天下之大僂矣○運疑此辟只是偏未到

拂人之性僂只是詛咒詩云般之未喪師克配上帝儀監

于般峻命不易道得衆則得國失衆則失國喪去聲凡訓

詩作宜峻詩作駿易音異○詩文王篇師衆也配對也配

上帝言其為天下君而對乎上帝也監視也峻大也不易

言難保也道言也引詩而言此以結上文兩節之意有天

下者能存此心而不失則所以繫矩而與民同欲者自不

能已矣○運謂能明其德以及民命之所以新也不慎其

德以失民命之所以去也此一言得失見天命視乎民心

是故君子先慎乎德有德此有人有人此有土有土此有

財有財此有用先極乎德承上文不可不謹而言德即所

謂明德有人謂得衆有土謂得國有國則

不患無德者本也財者末也本上文而言○因言人土而併及財用又因以明物有本

末之義明德而自無訟一本末之象也慎德而自有財用亦一本末之象也壹是皆以修身為本本無二本末不一

也外本內末爭民施奪人君以德為外以財為內則是爭財者人之所欲不能絜矩而

財專之則民亦起而爭奪矣是故財聚則民散財散則

民聚外本內末故財聚爭民施奪故是故言悖而出者亦

悖而入貨悖而入者亦悖而出悖背通○悖逆也此以言

先慎乎德以下至此又因財貨以明能絜矩與不能者之

得失也○民情所好莫重於利所惡莫重於專利故指明

之康誥曰惟命不于常道善則得之不善則失之矣道言

上文引文王詩之意而申言之其反覆丁寧之意楚書曰

至深切矣○此二意得失見天命視乎君德也

楚國無以為寶惟善以為寶

楚書楚語言不寶金玉而寶善人也

舅犯曰亡

人無以為寶仁親以為寶

舅犯晉文公舅狐偃字子犯亡人文公時為公子出亡在外也

仁愛也事見檀弓此兩節又明不外本而內末之意

秦誓曰若有一个臣斷斷今無

他技其心休休焉其如有容焉人之有技若己有之人之

彥聖其心好之不管若自其口出寔能容之以能保我子

孫黎民尚亦有利哉人之有技媚疾以惡之人之彥聖而

違之俾不通寔不能容以不能保我子孫黎民亦曰殆哉

書个作介今作倚寔作是斷丁亂反媚音目○秦誓周書斷斷誠一之貌彥美士也聖通明也尚庶幾也媚忌也違

拂戾也始危也○逆謂此三節皆因引康誥而類及之善則得之則宜惟善以為寶矣仁親孝弟也保子孫黎民慈

也唯仁人放流之逆諸四夷不與同中國此謂唯仁人為

能愛人能惡人逆讀屏古字通用疾之人妨賢而病國則仁人必深惡而痛

絕之以其至公無私故能得好惡之正如此也因上素

誓復申民之父母見有容之能保民者必民所好逆疾之

不能保民者必民所惡能絜知見賢而不能舉舉而不能

之仁人必以民心為己心也命鄭胡當作

先命也見不善而不能退退而不能遠過也悒聲之轉程

子謂當作怠字之訛也並通遠去聲凡有意離之故此○

若此者知所愛惡矣而未能盡愛惡之道蓋君子而未仁

也○好人之所惡惡人之所好是謂拂人之性菑必逮夫身

○昔古災字夫音扶凡語辭倣此○拂逆也好善而惡惡人

之性也至於拂人之性則不仁之甚者也自秦晉至此又

皆以中言好惡公私之極以明上文所引南山有臺節南

山之章○逆謂情可拂而性不可拂情有私而性則皆善

也是故君子有大道必忠信以得之驕吝以失之

君子以位言之

道謂居其位而修己治人之術發已自盡為忠循物無違謂信驕者矜高吝者侈肆此因上所引文王康誥之意而決矣○此三言得失而語益加切蓋至此而天理存亡之幾誠者物之終始不誠無物必以實心體實理而後謂之誠故于吾心有毫末之不盡非誠也于物理有毫末之有違非誠也誠之用好惡而已矣如惡惡臭如好好色發已自而忠也誠之本也民好好之民惡惡之循物無違自己以及天下信也誠之通也物有本末斯物物之事有終始欲及天下信也誠之通也物有本末斯物物之事有終始欲能慎德則貴乎察知矣天下之平豈在明明德外哉故大學之直功在誠意而必以格物致知為之道也章內三言得失而發歸忠信忠信者德之所由能慎而矩之所由能察此三綱八月之統會也又擇經之特筆

生財有

大道生之者衆食之者寡為之者疾用之者舒則財恆足

矣呂氏曰國無游民則生者衆矣朝無佞位則食者寡矣

此因有土有財而言以明足國之道在乎務本而節用非

仁者以財發身不仁者以身發財發猶起也仁者散財以

貨不外本內末故財散然財散而未有上好仁而下不

好義者也未有好義其事不終者也未有府庫財非其財

者也上好仁以愛其下則下好義以忠其上所以事必有

形貨之不悖出民之聚者財究未嘗終而府庫之財無悖出之患也○此以事之必有終

散也仁者德之聚也不慎德烏能仁孟獻子曰畜馬乘不

察於雞豚伐冰之家不畜牛羊百乘之家不畜聚斂之臣

與其有聚斂之臣寧有盜臣此謂國不以利為利以義為

利也乘去聲凡車乘放此其居之則平聲欬去聲○孟獻
 也子魯之賢大夫仲孫蔑也畜馬乘士初試為大夫者
 也五上乃命為大夫伐冰之家卿大夫以上喪祭用冰者
 也百車之家有采地者也君子寧亡己之財而不忍傷民
 之力故寧有盜臣而不畜聚斂長國家而務財用者必自
 之臣此謂以下釋獻子之言也
 小人矣彼為善之小人之使為國家菑害並至雖有善者
 亦無如之何矣此謂國不以利為利以義為利也長上聲
 善去聲善者之善上聲後並放此○自由也言由小人舉
 之也此一節深明以利為利之害而重言以結之其丁寧
 之意切矣○務財用之小人民之所惡也而彼善之則所
 好拂人之計而于善者必不知好矣天爵至而不體人害
 平而不恤不恤其德天命人心無不失也君子明乎義利
 之分固非以義求利而言利之害又必至此可不重以為
 哉戒

右傳之十章釋治國平天下

此章之義務在與民同好惡而不專其利皆推

廣絮矩之意也能如是則親賢樂利各得其所而天下平矣

凡傳十章前四章

統論綱領旨趣後六章細論條目工夫其第五章

乃明善之要第六章乃誠身之本在初學尤為當

務之急讀者不可以其近而忽之也

此朱子明大學與中庸相

貫也運細玩之大學經言明德而傳舉明命以探其原經言誠意而傳揭慎獨以提其要經詳三綱八目而傳歸之忠信以統其全三者傳之特筆曾子傳心之要也子思受之故作中庸首言天命之謂性明命之旨也曰莫見莫顯曰內省慎獨之旨也曰所以行之者一曰至誠為能盡性盡人物之性則于忠信之旨尤加詳焉孟子受之曰性善陳天命也曰利與善之間曰幾希明謹幾也至於思

誠一而則其得于子思者尤為明養然則
後世有志聖賢之學者其尚用力于斯哉

禮記

卷一之一

去

禮記卷一之一終

禮記卷一之二

子朱子章句 在啓運附註

中庸

孔本第三十朱子入學禮第十二今定為禮記第二。朱子曰中者無過不及之名庸平常也

子程子曰不偏之謂中不易之謂庸中者天下之正道庸者天下之定理此篇乃孔門傳授心法子思恐其久而差也故筆之于書以授孟子其書始言一理終散為萬事末復合為一理放之則彌六合卷之則退藏於密其味無窮皆實學也善讀者玩索而有得焉則終身用之有不能盡者矣熹聞之先君子常以為大學者此篇之戶庭而此篇則大學之闢奧也今亦本程氏別為章句云運按孔叢子言中庸四十二章後人海有分合然總不若朱子三十三章之當也首章總目末章總收中分三章支第一支言達德第二支言達道第三支言誠誠有是德乃能行是道是前後二支皆為中一支設也

天命之謂性率性之謂道修道之謂教

朱子曰天命猶令也性即理也天以陰

陽五行化生萬物氣以成形而理亦賦焉猶命令也於是
 人物之生因各得其所賦之理以為健順五常之德所謂
 性也率循也道猶路也人物各循其性之自然則其日用
 事物之間莫不各有當行之路是則所謂道也修品節之
 也性道雖同而氣稟或異故不能無過不及之差聖人因
 人物之所當行者而品節之以為法於天下則謂之教若
 禮樂刑政之屬是也蓋人知己之有性而不知其出於天
 知事之有道而不知其由天性知聖人之有教而不知其
 因吾之所固有者裁之也故子思於此首發明之而董子
 所謂道之大原出于天亦此意也。運謂言道者溯而上
 之極於天止矣天也者無外之名天以上不容說也至于
 性則就物言之故其文從生從心蓋天無心生物即其心
 所生之物因各得此生生之心以為心是即其性矣無知
 也而知即從此出無為也而為即自此行故道之文從足
 從首謂達于是始也太極以上不容說故子思曰一陰一陽
 之謂道人生以上不容說故子思曰率性之謂道若理乃
 王文細密之名孟子言始終條理子思言文理密察孔子
 言窮理盡性以至于命皆就分別細密處言之非太本處

原之名也。朱子言天即理性，即理與易言性命之理同言。渾然中即具此秩然之理耳。或乃謂先有此理，乃有是天。謬之。道也者，不可須臾離也。可離非道也。是故君子戒慎

乎其所不睹，恐懼乎其所不聞。離去聲。道者日用事物當行之理。通皆性之德。

而具于心。無物不有，無時不然，所以不可須臾離也。

存敬畏，雖不見聞，亦不敢忽，所以存天理之本然而不使

離於須臾之頃也。○運按此統體之功，由動而靜，一以貫

之者也。須臾不離，莫見乎隱，莫顯乎微，故君子慎其獨也。

則純亦不已矣。

見音現。凡皆見之見，故此。○隱暗處也。微細事也。獨者人

所不知而已。所稱知之地也。言幽暗之中，細微之事，雖

未形而幾則已動。人雖不知而已，獨知之則是天下之事

無有著見明顯而過于此者。是以君子既常戒懼而于此

尤加謹焉。所以過人欲下將而而不使其習滋暗長。子

微之中，以臣離道之遠也。○運按此關隘之地，扼要之功

魯已 中庸 卷一之二 七

其在動靜之交也。聞其邪斯存其誠。人欲過則天理存矣。喜怒哀樂之未發謂之中發

而皆中節謂之和中也。者天下之大本也。和也者天下之

達道也。

中如字。中節中。上聲。喜怒哀樂情也。其未發則性也。無所偏倚。故謂之中。發皆中節。情之正也。無

所乖戾。故謂之和。大本者天命之性。天下之理皆由此出

也。此言性情之德。以明道不可離之意。運按仁義禮智

所性之道。心惻隱羞惡辭讓是非。其情也。愛惡欲懼所性

之人心。喜怒哀樂其情也。不言仁義禮智。即人所共信其

有者。明之。喜中節。即仁。怒中節。即義。樂中節。即禮。哀中節

即智。人心。誠道心。而出也。喜怒哀樂。觸物斯形。則未發時

非無也。寂然之中。無所不有。非天命之而誰異之哉。則因

是。可以識性情。本乎性。性本乎天。性為吾身羣動之

本。天為萬物性命之本也。雖欲離之。焉得而離之。致中

和。天地位焉。萬物育焉。致指而極之也。位者安其所也。育

者遂其生也。自戒懼而約之。致中

紀紀以至下至靜之中無少偏倚補抄而其守不失

誠知以至下應物之處無少差謬補抄而無遺不然

不然而猴極地雖有則極其和而萬物育矣蓋天地萬物

本吾一體吾之心正則天地之心亦正矣吾之氣順則天

地之氣亦順矣物歸天地之故其效驗至于如此此學

問之極功聖人之能事初非有待于外而修道之教亦在

其中矣是其一體一用雖有動靜之殊然必其體立而後

用有以行則其實亦非有兩事也故于此合而言之以結

上文之意。運接後者推而極之然非有加于性分也所

性之理必如是而後盡稍不至即歎焉而位育之效又不

待既至而有也隨吾分之大小學力之淺深而奏焉天君

秦百體從一身之位育也父母順家室宜一家之位育也

君君臣臣民得其安物得其所一國之位育也三辰明八

風序河岳懋柔外內順治天下之位育也德日進業日廣

各如其人之自為故以堯舜之聖而朱均之子共轡之臣

不得于位育借庇焉其不致中和者自在朱均共轡也春

秋戰國統亡接踵而孔孟一治比列禹周其致中和者自

在孔孟也學者自致之自驗之其必有悠然有餘浩然自足者矣

右第一章

子思述所傳之意以立言首明道之本原出于天而不可易其實體備于已而不可

離次言存養省察之要終言聖人功化之極蓋欲學者於此反求諸身而自得之以去夫外誘之私而充其本然之善楊氏所謂一篇之體要是也其下十章蓋子思引夫子之言以終此章之義。通

按此章全書之目其下分三友總以明此章之義

仲尼曰君子中庸小人反中庸

中庸者不偏不倚無適不及而平常之理乃天命所

當然精微之極致也惟君子為能體之小人反是

君子之中庸也君子而時中小

人之中庸也小人而無忌憚也

王肅本作小人之反中庸也程朱皆從之。君子之

所以為中庸者以其有君子之德而又能隨時以處中也小人之所以反中庸者以其有小人心而又無所忌憚

也蓋中無定體隨時而在是乃平常之理也君子知其在此故能戒謹不睹恐懼不聞而無時不中小人不知有此則肆欲妄行而無所忌憚矣。運按道之所貴者中之所貴者時蓋時者天命之流行也與時偕行豈易言哉故以仲尼之聖而假年學易戒慎恐懼如是乎無已也若曰我能隨時處中信手拈來頭頭是道則已為無忌憚之小人矣

右第二章

此下十章皆論中庸以釋首章之義文雖不屬而意實相承也變和言庸者游氏曰

以杜情言之則曰中和以德行言之則曰中庸是也然中庸之中實兼中和之義。運按此為第一

首

子曰中庸其至矣乎民鮮能久矣

過則失中不及則未至故惟中庸之德為至然

亦人所同得初無難事但世故衆民不興行故鮮能之今已久矣論語無能字

右第三章

子曰道之不行也我知之矣知者過之愚者不及也道之

不明也我知之矣賢者過之不肖者不及也知者之知智同後凡知行

之知平聲知仁之知去聲。道者天理之當然中而已矣

知愚賢不肖之過不及則生稟之異而失其中也知者知

之過既以道為不足行愚者不及知又不知所以行此道

之所以常不行也賢者行之過既以道為不足知不肖者

不及行又不求所以知此道之所以常不明也。運按行

由于知而知之進亦由于行饑之于食寒之于衣必求其

得此行之由于知也由其途乃識其途之險易入其室人

乃識其室之深廣此知之由于行也行日進知日進也人

莫不飲食也鮮能知味也道不可離人自不察是以有過

而不著焉習矣而不察焉醉死夢運按孟子曰行之

生而不自覺若此多矣吁可懼哉

右第四章

通按通上二章見中庸世君子能之餘不特小人反是凡知愚賢不肖皆不能以起

知仁勇

之意

子曰道其不行矣夫

由不明故不行

右第五章

此章承上章而舉其不行之端以起下章之意

子曰舜其大知也與舜好問而好察邇言隱惡而揚善執

其兩端用其中於民其斯以為舜乎

舜之所以為大知者以其不自用而取諸

人也邇言者淺近之言猶必察焉其無遺善可知然于其言之未善者則隱而不宣其善者則播而不隱其廣大光明又如此則人孰不樂告以善哉兩端謂衆論不同之極致蓋凡物皆有兩端如小大厚薄之類於善之中又統其兩端而量度以取中然後用之則其擇之審而行之至矣然非在我之權度精切不差何以與此此知之所以無過

不及而道之
所以行也

右第六章

運按承上章見必如舜之大知然後能行也舜生知者也生知則自安行矣由仁義

行皆由明物察倫出故曰生知安行者知也

子曰人皆曰予知驅而納諸罔獲陷阱之中而莫之知辟

也人皆曰予知擇乎中庸而不能期月守也罔音古獲胡化反阱之性

反辟避同期非同○罔猶也獲機檻也陷阱坑坎也皆所以掩取禽獸者也擇乎中庸辨別眾理以求所謂中庸即

上章好問用中之事也○期月匝一月也言知禍而不知避以况能擇而不能守皆不得為知也

右第七章

承上章大知而言又舉不明之端以起下章也

子曰回之為人也擇乎中庸得一善則拳拳服膺而弗失

之矣也。回孔子弟子顏淵名譽年捧持之貌服膺者也。庸庸者不能也。奉持而著之心胸之間言能守也。顏子蓋真知之故能擇能守如此此行之所以無過不及而道之所以明也。

右第八章

運按承上章見必如回之能守然後為真知也。顏子利行者也。利行而學知乃不虛

矣不然知及之而仁不能守之雖知猶不知耳故曰學知利行者仁也。

子曰天下國家可均也爵祿可辭也白刃可蹈也中庸不

可能也

均平治也三者亦知仁勇之事天下之至難也然皆倚于一偏故資之近而力能勉者皆足以能之

至于中庸雖若易能然非義精仁熟而無一毫人欲之私者不能及也三者難而易中庸易而難此民之所以鮮能也。運按賢知者其資同近而愚不肖者亦力可勉若義之精則非知之無過不及不能而知與愚均無與仁之熟則非行之無過不及不能而賢與不肖均無與矣。

右第九章 亦承上章 以起下章

子路問強 子路孔子弟子仲由也子路好勇故問強 子曰南方之強與北方之

強與抑而強與 抑語辭而汝也 寬柔以教不報無道南方之強也

君子居之 寬柔以教謂含容與順以誨人之不及也不報無道謂備逆之來直受之而不報也南方風氣

柔弱故以含忍之力勝人爲強君子之道也 衽金革死而不厭北方之強也而

強者居之 衽席也金戈兵之屬革甲冑之屬北方風氣剛勁故以果敢之力勝人爲強強者之事也○運

按南北皆偏而子路剛強類北方之氣故辭氣抑揚若此若以告冉求必不然 故君子和而不流

強哉矯中立而不倚強哉矯國有道不變塞焉強哉矯國

無道至死不變強哉矯 此四者汝之所當強也矯強貌詩矯矯武臣倚偏著也塞未達也國

有道不變未達之所守國無道不變平生之所守也此則所謂中庸之不可能者非有以自勝其人欲之私不能擇而守也君子之強孰大于是夫子以是告子路者所以抑其血氣之剛而進之以德義之勇也○運按南北之強俗由和而不流乃能處俗而不變于俗然立身者化俗之本必先自立于大中而無少偏倚者乃能之至于達而兼善斯能變俗即窮而獨善亦終不變于俗則不倚之至矣

石第十章

運按承上章言中庸雖不可能而勇于擇則義可精勇于守則仁可熟不能而求至

事也
子能之

子曰素隱行怪後世有述焉吾弗爲之矣

素漢書作索字之誤也素隱行

怪言深求隱僻之理而過爲詭異之行也然以其足以欺世而盜名故後世或有稱述之者此知之過而不擇乎善行之過而不用其中不當強而強者也聖人豈爲之哉○
運按賢知之過不患其不能強特患強其所不當強耳故

其悞每在始君子遵道而行半途而廢吾弗能已矣則能擇乎

善矣半途而廢則力之不足也此其知雖足以及之而不行

有不逮當強而不強者也已止也聖人於此非勉焉而不

敢廢蓋至誠無息自有所不能止也○運按愚不肖之不

及知原不真行更不力不患強所不當強特患于所當強

終不能強也故君子依乎中庸遯世不見知而不悔唯聖

其難僂見于終君子依乎中庸遯世不見知而不悔唯聖

者能之不為素隱行怪則依乎中庸而已不能半途而廢

蓋仁之至不積勇而裕如者正吾夫子之事而猶不自居

也故曰唯聖者能之而已○運按依則與之為一不徒遵

也不知不悔不見是而無悶有述非所忻也正夫子之事

而猶曰唯聖者能之聖不自聖正以允執厥中與時偕行

之難也然則君子而時中者必夫子哉

右第十一章

子思所引夫子之言以明首章之義者此此蓋此篇大旨以知仁勇三達德為

入道之門故於篇首卽以大舜顏淵子路之事明之舜知也顏淵仁也子路勇也三者發其一則無以造道而成德矣餘見第二十章○運按自仲尼曰至此爲第一支以德言鮮能知者不知不能期月守者不仁中庸不可能者無勇必該知仁勇之全乃爲德之盛而道于是乎明行也故言德而以

孔子結之

君子之道費而隱

○費符味反○費用之廣也隱體之微也○運按天命之性天下之大本隱也率

性之道天下古今所共由費也就性以言道固隱而費矣若就道而言則物物各具一道費也而天命之性自行乎其中隱也乃費而隱矣道如是修道之功亦如是故由博學而人先得其所爲費漸反說約次求其所隱至于下學而上達盡人以合天而不顯之德與上天之夫婦之道可截無聲無臭同則君子之體道亦費而隱矣夫婦之道可以與知焉及其至也雖聖人亦有所不知焉夫婦之不肖

可以能行焉及其至也雖聖人亦有所不能焉天地之大

也人猶有所憾故君子語大天下莫能載焉語小天下莫

能破焉與去聲○君子之道近自夫婦居室之間遠而至

謂費矣然其理之所以然則隱而莫之見也蓋可知可能

者道中之一事及其至而聖人不知不能則舉全體而言

聖人固有所不能盡也候氏曰聖人所不知如孔子問禮

問官之類所不能如孔子不得位堯舜病博施之類愚謂

人所憾于天地如覆載生成之偏及寒暑災祥之不得其

正者○運按就人言則愚不肖小而聖人大就人與天地

言則聖人亦夫婦夫婦小而天地大矣聖人所不知能者

自人視之惟聖人為能盡道其不知能者必技術之微時

地之異耳自聖人自視則人倫日用之常其不能盡者正

多蓋道無盡終身由之無盡也人所憾于天地者大約在

氣數之偏若覆載生詩云鳶飛戾天魚躍于淵言其上下

成之理固無有憾也

察也

詩大雅旱麓之篇鸛鳴類反至也察者也子思引此詩以明化育流行上下昭著莫非此理之用所謂費

也然其所以然者則非見聞所及所謂隱也故程子曰此

一節子思弊察為人處活潑潑地隨者其致思焉○運按

言夫婦言天地為大為小猶有質可指名至于飛躍所至

則空虛無物之中皆道所充塞而不可離者俱見君子之

所以成慎不惰悉君子之道造端乎夫婦及其至也察乎

懼不闕正以此也○運按此因上下察而切言之知道造端乎

天地夫婦則學必始乎人婦在席之間皆天命也知道造端

天地夫婦則學必始乎人婦在席之間皆天命也知道造端

天地夫婦則學必始乎人婦在席之間皆天命也知道造端

天地夫婦則學必始乎人婦在席之間皆天命也知道造端

天地夫婦則學必始乎人婦在席之間皆天命也知道造端

天地夫婦則學必始乎人婦在席之間皆天命也知道造端

天地夫婦則學必始乎人婦在席之間皆天命也知道造端

天地夫婦則學必始乎人婦在席之間皆天命也知道造端

天地夫婦則學必始乎人婦在席之間皆天命也知道造端

天地夫婦則學必始乎人婦在席之間皆天命也知道造端

不第此為

子思之言蓋以申明首章道不可離之意也其下八章雜引孔子之言以明之

子曰道不遠人人之為道而遠人不可以為道道者率性而已因眾

人之所能知能行者也故常不遠于人若為道者厭其卑近以為不足為而反務為高遠難行之事則非所以為道

矣○運按此詩云伐柯伐柯其則不遠執柯以伐柯睨而一章之大指

視之猶以為遠故君子以人治人改而止詩幽風伐柯之篇柯斧柄則法

也睨邪視也言人執柯伐木以為柯者彼柯長短之法在此柯耳然猶有彼此之別故伐者視之猶以為遠也若以

人治人則所以為人之道各在當人之身初無彼此之別神運不故君子之治人也即以其人之道還治其人之身

其人能改即止不治蓋責之以其所能知能行非欲其遠人以為道也帥紆綬人張子所為以眾人望人則易從是

也○運按改而止非苟而止也肯乎道不可不改也改忠而未至于道亦不可止也道如是而止則治如是而止忠

恕違道不遠施諸已而不願亦勿施於人盡已之心為忠推已及人為恕

遠去也言自此至彼相去不遠非背而去之謂也道即
 其不遠人者是也施諸已而不願亦勿施于人忠恕之事
 也以已之心度人之心未嘗不同則道之不遠人者可見
 也○運接君子有謂已而後求諸人無諸已而后非諸人
 道之事辨乎誠人張子所謂以愛已之心愛人則盡仁是
 也○運接君子有謂已而後求諸人無諸已而后非諸人
 有諸已無諸已忠也而后求而后非忠以行恕也君子之
 若曰我之不能人亦可恕是相率而為自棄也已○君子之
 道四丘未能一焉所求乎子以事父未能也所求乎臣以
 事君未能也所求乎弟以事兄未能也所求乎朋友先施
 之未能也庸德之行庸言之謹有所不足不敢不勉有餘
 不敢盡言願行行願言君子胡不慥慥爾子臣弟友字絕
 道不遠人凡已之所以責人者皆道之所當然也紳履
 故以之自責而自修焉紳履庸平常也行者設棋

實謹者釋其可德不足而勉則行益力言有餘而切則謹益至謹之至則言願行矣行之力則行願言矣勉隨篤實貌言君子之言行如此豈不慤慤乎贊美之也凡此皆不遠人以為道之事張子所謂以責人之心責己則盡道是也。運按聖人甫言忠恕即思己之未忠而無以為恕自反誠切如此真聖人望道如未見之心也

右第十三章 道不遠人者夫婦所能工未能一者聖

隱存焉下章放此。運按通下三章皆承造端乎夫婦對賢知之過言也賢知之過素隱行怪但求之高遠視子臣弟友之事以為卑近而不足為不知孔子大聖猶自責自修如此徒事高遠者可知所反矣

君子素其位而行不願乎其外素猶見在也言君子但因見在所居之位而為其所

當為無慕乎其外之心也。運按此因上庸德之行而言子臣弟友之倫人所同也而位各異因其位而俱可以自

盡不自盡而責人則願乎外矣素富貴行乎富貴素貧賤行乎貧賤素夷

狄行乎夷狄素患難行乎患難君子無入而不自得焉去聲

聲凡患難之難放此○此言素其位而行也○翔曰道一而行之者不一大行不加窮居不損道之一也隨事順理

因時處宜行之正不一也在上位不陵下在下位不援上正已而不求

於人則無怨上不怨天下不尤人此言不願乎其外也故君子居易

以俟命小人行險以僥幸易大聲凡難易之易放此○易

不願乎外也僥求也幸謂所不當得而得者○運按君子無不知命然不能居易以俟之恐于道未盡也小人每多

傲幸苟不至行險以僥子曰射有似乎君子失諸正鵠反

之射于道未大悖也求諸其身正音征或作鴟鵂工壽反○費布曰正棲皮曰鶴者侯之中射之的也子思引此孔子之言以

中庸 卷之二 二

結上文之意。運按反求諸身已乃正已正乃能自得。

右第十四章

子思之言也。凡章首無子曰字放此。○運按此因上章而析言之。更審言之。同

此子臣弟友而位不同。則道文不同。菽水承歡貧賤之孝。以天下國家養富貴之孝。并原不死。患難之孝。臣與弟友皆然。理析之而愈微。心斂之而愈密。所謂君子時中也。賢知之人。負其氣。輒肆怨尤。恃其才。且圖行險。而性命之理。凶矣。不知此卑邇中。正有探之無窮。行之不盡者。而何用顧外為哉。賢知之過宜知所返矣。

君子之道辟如行遠必自邇辟如登高必自卑

辟譬同。○運按自邇

自卑循序漸進不必索隱行怪也。望之以為高遠至之仍卑邇也。君子終身卑邇而已。若夫愚不肖則畏其高遠不行登也。即行之登。詩曰妻子好合如鼓瑟琴兄弟既翕和之亦半塗而廢矣。

樂且耽宜爾室家樂爾妻

雅詩作湛幣一作琴○詩小雅采芣之篇鼓瑟琴和也

亦合也耽亦樂也幣子孫也

○運訓好合合之好也仲尼

不形于動靜情欲無介于儀容樂而不淫乃如琴瑟之靜

好已耽樂之久也家道之勝多起于婦人故兄弟之和樂

必以妻之好合乃能久宜爾室且宜爾家和氣滿于門內

矣樂與妻且樂爾室

子曰父母其順矣乎

夫子誦此詩而贊之曰人能和

于女子宜于兄弟如此則父母其安樂之矣子思引詩及

此語以明行遠自邇登高自卑之意○運按父母之順極

之事天明明事地察近之則亦夫婦之所與知與能未

有夫婦不好合而父母能順者也故曰造端乎夫婦

右第十五章

按結君子之造造端乎夫婦之意道造端乎夫婦之意

夫婦易以成恒配乾地坤地詩首關雎書稱釐降禮始

于禮夫婦春秋記姬歸姜至皆是道也李文貞言

夫婦天合之終人合之始其德主智智者仁義之

基朱子謂幽暗之中枉席之上人或餐而慢之則

天命有所不行君子之戒懼慎獨莫切于此亦莫危于此此賢知之所不敢眇為易而愚不肖亦未嘗不可用其慎也

子曰鬼神之為德其盛矣乎

程子曰鬼神天地之功用而造化之迹也張子曰鬼神者

二氣之良能也應謂以二氣言則鬼者陰之靈也神者陽之靈也以一氣言則至而伸者為神反而歸者為鬼其實一物而已為德猶言性情功效○運謂鬼神即上天之載天命之所以行而人性之所自來也德即知仁勇也語其清濁知陽仁陰語其動靜仁陽知陰其大生者仁各正者知不已者勇也能生能長能收能藏陰陽各一其性欲生欲長欲收欲藏陰陽各一其情生之長之收之藏之陰陽各一其功物之既生既長既收既藏陰陽各一其效性情者良能功者功用視之而不見聽之而不聞體物而不可效即造化之迹也

遺

鬼神無形與聲然物之終始真非陰陽合散之所為是其為物之體而物之所不能遺也其言體物猶易言幹

事○運謂生長誠之通收藏故
之復不誠則無物故不可遺
使天下之人齊明盛服以

承祭祀洋洋乎如在其上如在其左右
齊側皆反凡齊戒之齊故此○齊之

為言齊也所以齊不齊而致其齊也明猶潔也洋洋流動

充滿之意能使人畏敬奉承而發見昭著如此乃其體物

而不可遺之驗也孔子曰其氣發揚于上為昭明焄蒿悽

愴此百物之情也神之著也正謂此爾○運謂鬼神只陰

陽之氣其無妄即誠也入陽也地陰也日天之陽月天之

陰山神之陽地之陰雷自地交天陰之陽風自天施地

陽之陰天地無私日月山川風雷無私其氣之屈伸無不

誠故無不神有功于人入必祀之其心所不能自已即鬼

神之也若人則形生是鬼神發是神手足皆知苛擾即

鬼之神心知因物而寄即神之鬼而食味別身被色其養

形者又足以生神故人之靈雖死不窮堯舜周孔其誠萬

世之神亦萬世其餘取精多用物宏者亦不易泯蓋誠者

之故有為萬世伏祀者有一時偶祀者天子祭天地日月

山川諸侯方祀天子七廟諸侯五庶人止及父母其牛在
所祀者功德有大小遠近其一在祀之者感格亦有大小
遠近誠動于此斯誠應于彼也若夫至愚不肖之人則其
死也與禽獸草木同其斷滅而已故曰其身已死其鬼不

靈詩曰神之格思不可度思矧可射思度待洛反凡審量

音亦○詩大雅抑之篇格來矧况射厭也言厭怠而不敬
也思語辭○愚按神之格不止承祭時則人之敬亦不止

承祭時必不愧于屋漏乃可也夫微之顯誠之不可揜如此夫誠者其實

陰陽合散無非實者故其發見之不可揜如此○不見不
聞微也體物而不可遺則顯矣顯者功效而不見不聞之

中有性情在焉性誠之存情誠之發而功效則誠之
著也惟微之中有是誠之體故能體乎物而不可遺

右第十六章前二章以其費之小者而言此後三章

以其費之大者而言此一章兼費隱包小大而言
○運謂中庸以天命起以天載終此一章其中權

也天之載鬼神行之天之命鬼神傳之天也人
一鬼神也第一支言德第三支言誠此章以德始
以誠終蓋上下二
支之樞紐關鍵也

子曰舜其大孝也與德為聖人尊為天子富有四海之內

宗廟饗之子孫保之

子孫謂虞思陳胡公之屬。愚按孝
庸德也孝至于舜則德為聖人而尊

富饗保從之矣始以孝大而福大繼以福大而孝顯大為
天子父尊之至也以天下養養之至也宗廟饗之并以其
親孝子孫保之并以其子孫
孝也反覆相因天人一貫故大德必得其位必得其祿

必得其名必得其壽

舜年百有十歲。按大德德為聖人
也位尊祿富而無名者不榮無壽者

不永故又故天之生物必因其材而篤焉故栽者培之傾

者覆之

材質也篤厚也栽植也氣至而滋息為培氣反而
崩散則覆。運按同一日之顯而栽者榮焉傾者

稿焉同一雨之活而裁者潤焉傾者朽焉詩曰嘉樂君子天何心哉日兩何心哉如其物之自為耳

憲憲令德宜民宜人受祿于天保佑命之自天申之詩大雅

樂之篇假官依此作嘉憲當依詩作顯申重也○運謂民在下者人在上者德足以宜民人則可嘉可樂而顯矣而

要其所以宜民人者豈有拘物于譽之為哉孝弟之道得乎人心之所同然而已故曰孝弟之至尤于四海無所不

通故大德者必受命受命者受天命為天子也○結必得之意

右第十七章

此由庸行之常推之以極其至見道之用廣也而其所以然者則為體微矣後

二章亦此意○運按通下三章皆承及其至察乎天地乃封愚不肖之不及言也孝本庸德夫婦之

愚不肖可與知與能而極其量遂至于此舜起于側微者也故首舉之

子曰無憂者其惟文王乎以王季為父以武王為子

之子述之

此言文王之事書言王季其勤王家蓋其所作亦積功累仁之事也。運按文王親民如傷望

道如未之見內文明而外柔順以蒙大難豈一無憂哉無

憂云者就父子論之也文王固精父之作子前尤藉武周

之述千後無憂者豫順之至也武王繼大王王季文王之

子思引之以承父母其順之意

緒壹戎衣而有天下身不失天下之顯名尊為天子富有

四海之內宗廟饗之子孫保之

此言武王之事續繼也大

王王季之父也書曰大王

王基王迹詩云季于大王實始

周壹戎衣武成文言壹著戎衣以伐紂也。按前有太王

則作之不惟王季武王末受命周公成文武之德追王大

矣并以起下追王

王王季上祀先公以天子之禮斯禮也違乎諸侯大夫及士庶人父為大夫子為士葬以大夫祭以士父為士子為

大夫葬以士祭以大夫期之喪達乎大夫三年之喪達乎

天子父母之喪無貴賤一也

追王之王去聲凡加尊者故此。此言周公之事末猶若

也追王蓋推文武之意以及乎王迹之所起也先公祖也以上至后稷也上祀先公以天下之禮又推大王王季之

意以及于無窮也制為禮法以及天下使葬用死者之祭用生者之祿喪服自期以下諸侯絕大夫降而父母之

喪上下同之推已以及人也。運按禮大傳武王牧野克殷即追王大王王季文王。若孔氏謂武王只加以王號此

周公攝位以王禮改葬非也武王末受命制作之事一出于公故即屬之公耳不謂武王崩周公攝王又一追王也

觀泰誓止稱文考金縢即一而三王是追王在武王時明矣夏商既王何嘗不祀先公。以天子禮而周王迹實肇自太

王故特追王所謂禮以義也。也商稱契曰予王是商于始祖常追王國語稱我先王后稷是周于后稷亦追王此不

追王后稷因商制也追王太王王季乃周所獨也非受天不立廟非受命于天不立廟故夏初四廟無太王

則商初五廟有始祖而無又命之王也周初即立七廟以
有文武也夏商庶士即起家為卿大夫不為祖父追立廟
則猶祭以士庶耳故上祀之下達自周始期之喪是旁期
孫為祖期不絕不降夏商以上即旁期不降也父在為母
期十有五月而禫統精三年以
木服言蓋服降而哀不絕也

右第十八章

運按子思引之與下章通為一由舜之
大孝而及武周之達孝必如此乃為盡

倫盡制
之極也

子曰武王周公其達孝矣乎

達通也承上章而言武王周
公之孝乃天下之人通稱之

孝猶五子之言達尊也
盡制實有以通乎人心之所同然故天下之人通稱之

夫孝者善繼人之志善述人之事

者也
上章言武王續大王王季文王之緒以有天下而
公成文武之德以道崇其先祖此繼志述事之大端

也下文又以其所制祭祀之禮通于上下者言之。按禮
乎上下以廟祭言上通乎祖宗下通乎子孫臣庶合郊社
言上通乎天地下通乎天下之人。春秋修其祖廟陳其宗器設其裳衣薦

其時食祖廟天子七諸侯五大夫三適士二官師一宗器

屬也裳衣先祖之遺衣服祭則設之以授尸也時食四時
之食各有其物如春行羔豚膳膏香之類是也。按修祖

廟先潔敬也陳宗器重世守也設裳
木象生存也薦時食以追養繼孝也宗廟之禮所以序昭

穆也序爵所以辨貴賤也序事所以辨賢也旅酬下為上

所以述賤也燕毛所以序齒也宗廟之次左為昭右為穆

人廟則子姓兄弟羣昭羣穆咸在而不失其倫焉爵公侯

之禮賓弟子兄弟之子各舉解於其長而衆相酬蓋宗廟
之中以有事為榮故逮及賤者使亦得以申其敬也燕毛

祭畢而燕則以毛髮之色別長幼為坐次也齒年數也。運謂序昭穆在東階之東西面北上以始分之世為次而子一列之中則序爵不序齒也序爵在西階之西東面北上以命數為次爵同則亦序齒若公有司私臣則在門東西北面以近門為上序事則有室事堂事若贊也至過食也燕飲皆上酬賓此以子弟之舉解為酬始故曰下為上言以此舉解代上之酬也交酬惟兄弟之子錯酬乃賓弟下兄弟之子皆舉解祭于廟燕于寢燕亦立異姓為賓而意上下養老故于踐其位行其禮奏其樂敬其所尊愛其昭穆中又序齒也

所親事死如事生事亡如事存孝之至也既無履也其指先王也所尊所

親先王之祖考子孫臣庶也始死謂之死既葬則曰反而此結上文兩節皆繼志述事之意也。運謂孝子之

行禮不絕于耳色不絕于目心志嗜欲不忘乎心一踐位奏樂無往不與先王相迎承心之所志皆先王

之志身之所行皆先王之志此之郊社之禮所以事上帝謂如生如存此之謂善繼善述也

也宗廟之禮所以祀乎其先也明乎郊社之禮禘嘗之義

治國其如示諸掌乎郊祭天社祭地不言后土者省文也

自出于太廟而以太祖配之也嘗秋祭也四時皆祭其

一耳禮必有義對舉之五文也示與視同示諸掌言易見

也。邇按南郊稱昊天上帝北郊稱皇地祗社稷之社以

后土配食游氏曰惟聖人為能饗帝惟孝子為能饗親

謂孝子之事親也如事天事天如事親故郊社禘嘗一也

李氏曰兄弟同出于父母父母本兄弟末也宗族同出于

祖宗祖宗本族姓末也民物同出于天地天地本民物末

也故孝于父母者必以父母之心為心而愛及兄弟孝于

右第十九章

運按結及其至也祭乎天地之意與

武王周公之孝亦父母順而已而其極

遂至于明天察地又何卑邇之非高遠矣而愚不
作者可諉曰願父母非善所能知能行吾能如是
已足耶則不得
半塗而廢也

哀公問政

哀公魯君名蔣

子曰文武之政布在方策其人存則其

政舉其人亡則其政息

方板也策簡也息猶滅也有是君有是臣則有是政矣

人道

敏政地道敏樹夫政也者蒲盧也

敏速也蒲盧沈括以為蒲葦是也以人立政猶

以地種樹其成速矣而蒲葦又易生之物其成尤速也言人存政舉其易如此

故為政在人取人

以身修身以道修道以仁

此承上文人道敏政而言也為政在人家語作為政在干得人

語意尤備人謂賢臣身指君身道者天下之達道仁者天
地生物之心而人得以生者所謂元者善之長也言人君
為政在干得人而取人之則又在修身
能仁其身則有君有臣而政無不舉矣
仁者人也親親為

大義者宜也尊賢為大親親之殺尊賢之等禮所生也

聲。仁者指人身而言其此生理自然便有惻怛慈愛之

意發體味之可見義者分別事理各有所宜也禮則節文

斯二者而已。運謂天地以生物為心故所生之物因各

得天地生生之理以為心故于已欲其生于人亦欲其生

即至禽獸草木亦無不樂其生憐其死者此生理即心之

德即天命之性也欲其生即愛之理即率性之道也聖人

全體此心隨處而應最近是親親由此而仁民而愛物以

次降焉其施之各酌其宜即義各有定則即禮見得明即

知行得到即勇是義禮智勇總一仁也今言之又仁由知

生禮以義起親親屬仁尊賢屬義以五倫言則父子兄弟

屬仁君臣朋友屬義夫婦之愛屬仁敬屬義以九經言則

子庶民來百工柔遠人屬仁故大臣體羣臣懷諸侯屬義

總言之則仁其身以仁天下總一生理之貫注周流仁外

無義義外無仁故學必至合天下以為仁然後吾心體全

而與天地生物之心相似也故君子不可以不修身想修身不可以不

事親思事親不可以不知人思知人不可以不知天為人

取人以身故不可以不修身修身以道修道以仁故思修

身不可以不事親欲盡親親之仁必由尊賢之義故又當

知人謂親之殺尊賢之等皆天理也故又當知天○運謂

知人者知人事所當然知天者知天理之本然人事所當

然修道也天理之本然天命也而修道必由敘而人故即

以尊賢之義當之若夫禮即天理之飾文天理中原有自

然之等級而非聖人定為禮制亦無以飾之文之而合天

理自然之則故由仁義推而下之則曰禮由事親知人溯

而上之則曰天也若已為天下之達道五所以行之者三

後天道人道引其端矣

曰君臣也父子也夫婦也昆弟也朋友之交也五者天下之達道也知仁勇三者天下之達德也所以行之者一也

達道者天下古今所共由之路即書所謂五典孟子所謂

父子有親君臣有義夫婦有別長幼有序朋友有信是也

七

知所以知此也仁所以體此也勇所以強此也誠而己矣達道雖人共
 者天下古今所同得之理也一則誠而已矣達道雖人共
 由然無是三德則無以行之達德雖人所同得然亦有不
 誠則人欲問之而德非其德矣程子曰所謂誠者止是實
 此三者三者之外更別無誠○運按此承上文詳道之目
 與仁之所以始所以成也道必知之然後能行之故先之
 以知惟聖人不賴勇而裕如賢人以下則賴勇矣故必合
 知勇以成仁也然與人言道有五入不能辭與言知仁勇
 則人人謝不能矣不知道因達道德亦達德或生而知之
 其不能行只少一誠耳豈三德有不達哉

或學而知之或困而知之及其知之其一也或安而行之或

利而行之或勉強而行之及其成功一也強上聲凡勉強

之所知行之者之所行謂達道也以其分而言則所以知
 者知也所以行之者仁也所以至于知之成功而一者勇也
 以其等而言則生知安行者知也學知利行者仁也困知
 者勇也蓋人性雖無不善而氣稟有不同者故則道

有發莫行道有難易然能自強不息則其至一也呂氏曰
所人之塗雖異而所至之域則同此所以為中庸若乃企
生知安行之資為不可幾及暨因知勉行為不能有成此
道之所以不明不行也○運按此中三德之為達德也天
下生安有幾而窳人子曰家語有公曰子之言美矣至矣
人可至非達德而何寡人固不足以當之也故復以
子曰起之子思刪其繁文好學近乎知力行近乎仁知恥
而不盡今當為衍文也此言未及乎達德而求以入德之事通上文三知
近乎勇為知三行為仁則此三近者勇之次也呂氏曰
者自是而不求自私者徇人欲而忘反懦者甘為人下而
不辭故好學非知然足以破愚力行非仁然足以忘私知
恥非勇然足以起懦○運按此正困勉之事非因勉下又
有此一等也蓋人莫忠乎無恥恥不若人則於學必好於
行必力不至知之一成功一其恥未已也故知恥開好學
力行之始周好學力行之中要好學力行之終非徒近之
於一知斯三者則知所以修身知所以修身則知所以治

人知所以治人則知所以治天下國家矣斯三者指三近而言人者對已

之稱天下國家則蓋乎人矣言此以結上文修身之意起下文九經之端也○按身修則人存為天下國家斯政舉

凡為天下國家有九經曰修身也尊賢也親親也敬大臣

也體羣臣也子庶民也來百工也柔遠人也懷諸侯也經

也體謂設以身處其地而察其心也子如父母之愛其子也柔遠人所謂無忘賓旅者也此列九經之目也呂氏曰

天下國家之本在身故修身為九經之本然必親師取友然後修身之道進故尊賢次之道之所進莫先齊家故親

親次之由家以及朝廷故散大臣體羣臣次之由朝廷以及其國故子庶民來百工次之由其國以及天下故柔遠

人故諸侯次之此九經之序也視羣臣猶吾四體視百姓

猶吾于此視臣視民之別也○按賢師保之官所謂當其為師則弗臣也大臣六卿之職為君腹心豈曰非體特慮其視其而不將故曰敬君使臣以禮羣臣執不當敬特慮

其地遠而易疎故曰體皆舉重而言百工受役於司空其
何以來之在司空此亦舉其綱耳遠人外而蕃國內而行
庶商賈皆是若朝聘之
賓則在懷諸侯一條內修身則道立尊賢則不惑親親則

諸父昆弟不怨敬大臣則不眩體羣臣則士之報禮重于

庶民則百姓勤來百工則財用足柔遠人則四方歸之懷

諸侯則天下畏之此言九經之效也道立謂道成於已而
可為民表所謂皇建其有極是也不惑

謂不疑於理不眩謂不迷於事敬大臣則信任專而小臣
不得以間之故臨事而不眩也來百工則通功易事農末

相資故財用足柔遠人則天下之服皆悅而願出於其望
故四方歸情諸侯則德之所施者博而威之所制者廣矣

故曰天下畏之按羣臣該大夫士而止言士之報禮者
古者五十命為大夫其未命則皆士又諸侯之大夫入天

子之國皆稱士也財與材同王制所謂天子之六工與制
六材天官九職以百工勸化人材也考工記攻木之工比

輪輿弓盧匠梓車供車輿官室溝池射侯飲器之用攻金
 之工六築治兒巢桃段供刀劍削刃鐔器斗斛之用攻皮
 之工五函鮑鞞韞裘供甲冑鼓鞞皮弁裘鞞之用設色之
 工五畫續鍾篔篥供給素染練之用刮摩之工五玉櫛雕
 矢磬供圭璧琬琿治矢磬之用搏埴之工二陶旋供磚瓦釜
 甑簠簋之用賓祭喪居服器皆資之士農工賈亦無不賴
 其器用也齊明盛服非禮不動所以修身也去護遠色賤貨而

貴德所以勸賢也尊其位重其祿同其好惡所以勸親親
 也官盛任使所以勸大臣也忠信重祿所以勸士也時使
 薄斂所以勸百姓也日省月試既稟稱事所以勸百工也
 送往迎來嘉善而矜不能所以柔遠人也繼絕世舉廢國
 治亂持危朝聘以時厚往而薄來所以懷諸侯也齊齊同去上聲

除之也其白去者則去聲後放此遠好惡敬並去聲既讀
儀稟讀應爾去聲後凡訓相合者放此。此言九經之事
也官盛任使謂官屬衆盛足任使令也蓋大臣不當親細
事故所以優之者如此忠信重祿謂待之誠而養之厚蓋
以身體之而知其所賴乎上者如此也既稟稍食也稱事
如周禮考其弓弩以上下其食是也往則爲之授節以送
之來則豐其委積以迎之朝謂諸侯見於天子聘謂諸侯
使大夫來獻王制比年一小聘三年一大聘五年一朝禮
往薄來謂燕賜厚而納貢薄。通按修身之事前已詳之
至此則德已成故但表裏動靜收攝整齊以存養之也去
讓遠色賤貨清明其志氣以相受也周公爲大宰聘季爲
司空皆以賢爲大臣餘若五叔無官亦與之以承地使君
之爲內諸侯是位尊祿厚也同其好惡謂其親也其親
上士倍中士中士倍下士制雖有寓焉試大夫則食大夫
之祿以重之也授節委積往來皆有之註互見耳唐虞諸
侯四年一朝夏殷五年一朝周禮侯服歲一見甸服二歲
男服三歲采服四歲衛服五歲要服六歲毛氏謂自夏
後數之實皆六年一朝也朝之明年小聘使大夫問一

大聘使卿大約十二年君兩朝卿四聘大夫六聘此定時也若王有大事諸侯特至曰會王不巡守諸侯皆至曰同此又以不時為時也聖人仁其身以仁天下自近至遠各如其分曲盡其情凡為天下國家有

九經所以行之者一也一者誠也二有不誠則是九者皆為虛文矣此九經之實也。運按

誠其身者立乎九經之先斯行乎九經即貫乎九經之內故行此九經者一部周官其事萬變而誠則一也

事豫則立不豫則廢言前定則不跲事前定則不困行前

定則不疚道前定則不窮凡事指達道達德九經之屬素定也跲躓也疾病也此承上

文言凡事皆欲先立乎誠如下文所推是也。運按事指之物行見之身因不能展布於內愧於心道則言行事之

源窮則源竭而置於流也行達道行九經莫不有言焉有行焉有事焉下文獲上信友順親皆達道之事治民則九

經之事而明善以誠身則其在下位不獲乎上民不可得道必誠之乃先立乎其本也

而治矣獲乎上有道不信乎朋友不獲乎上矣信乎朋友

有道不順乎親不信乎朋友矣順乎親有道反諸身不誠

不順乎親矣誠身有道不明乎善不誠乎身矣此又以在下位者推

言素定之意反諸身不誠謂反求諸身而所存所發未能

真實而無妄也不明乎善謂未能察於人心天命之本然

而真知至善之所在也○李氏曰五常之屬知在仁先故

學問之道知先而行繼五常之具信為之總故學問之實

誠存而德修運按獲上信友則親之道皆貴先立乎誠非

謂欲治民先求獲上欲獲上先求信友欲信友先求顯親

也如此則有為而為其所以誠者天之道也誠之者人之

道也誠者不勉而中不思而得從容中道聖人也誠之者

擇善而固執之者也 中並去聲從音春○此承上文誠身而言誠者真實無妄之謂天理之本

然也誠之者未能真實無妄而欲其真實無妄之謂人
 之當然也聖人之德渾然天理真實無妄不待思勉而從
 容中道則亦天之道也未至於聖則不能無人欲之私而
 其為德不能皆實故未能不思而得則必擇善然後可以
 明善未能不勉而中則必思勉然後可以誠身此則所謂
 人之道也不思而得生知也不勉而中安行也擇善學知
 以下之事固執利行以下之事也○運按誠者天之道天
 誠斯命亦誠故人之性無不誠也不勉而中仁之至不思
 而得知之至從容中道不賴勇而裕如聖人之德所性博
 而有與天合也擇善固執則盡人亦可以合於天矣博
 學之審問之慎思之明辨之篤行之此誠之之目也學問
 知學而知也篤行所以固執而為仁利而行也程子曰五
 者廢其一非學也○運按學不博則無以盡古今事理之
 變問不審則無以發吾心之所昧而告亦不詳思不慎則
 泛濫而無歸或過深而反鑿皆無以得事理當然之本介
 此三者皆積於平日辨則於當幾之介其是非無一毫之
 不析也必如此然後可以行此於大學皆格致之事而辨

畧異者曾子篤實故大學言誠正修於行為備
子思明睿故中庸言學問思辨於知較密也
有弗學學

之弗能弗措也有弗問問之弗知弗措也有弗思思之弗

得弗措也有弗辨辨之弗明弗措也有弗行行之弗篤弗

措也人一能之已百之人十能之已千之君子之學不為

其成故常百倍其功此困而知勉而行者也勇之事也○

運按困勉之功於學不言博記誦皆難不能博也問不言

審知識昏昧無可審也思不言慎拘固罕通原無泛濫穿

鑿之患也至於辨則斷不可不明行斷不可不篤困勉者

視學利者倍難故以弗能弗果能此道矣雖愚必明雖柔

措矢其志已下已百奮其功果能此道矣雖愚必明雖柔

必強明者擇善之功強者固執之效呂氏曰君子所以學

柔者可進於強不能勝之則雖有志於學亦思不能明柔

不能強而已矣蓋均善而無惡者性也人所同也昏明強

禮記

中庸

卷一之二

三

弱之與不齊者才也人所異也誠之者所以反其同而變其異也夫以不美之質求變而美非百倍其功不足以致之今以由莽滅裂之學或作或輟以變其不美之質及不能變則曰天質不美非學所能變是果於自棄其為不仁其矣○運按擇者知執者仁強者勇而此以嚴屬行者強於行尤見之所謂困知勉行者勇也

有第二十一節

此引孔子之言以繼大舜文武周公之

耳蓋包費隱兼小大以終十二章之意章內語誠始詳而所謂誠者實此篇之樞紐也博學之以下家語所無意彼有闕文抑此或子思所補較○道也自君子之道費而隱至此為第二支以道言道無所不在其最切者為五倫始於家則父子合兄弟翁斯父母順達之國與天下則順乎親乃信乎友復乎上而可以治民事親者尤五倫之統彙也其言為庸言其行為庸行語其下則愚夫愚婦可以與知與能言其極則率天明德事地察者印在此故以人視聖人則舜之大孝武王周公之達孝後

世與尚焉而以聖人自視則孔子且自謂事父未
能事兄未能矣然聖者能也學聖者亦能也學問
思辨則知愚所不能知者可能篤行則賢不肖不
能行者可能果能此道則以三達德行五達道而
人人可能也豈曰唯聖者能之而
已哉故言道而以孔子再結之

自誠明謂之性自明誠謂之教誠則明矣明則誠矣自由也德

無不實而明無不照者聖人之德所性而有者也天道也
先明乎善而後能實其善者賢人之學出教而入者也人
道也誠則無不明矣明則可以至于誠矣。運按聖人之
誠無不明也明在誠中賢人之明未達誠也誠在明後然
果至于誠則亦誠而明矣始有異終無異也
上二句原其始之分下二句要其終之合

右第二十一章 子思承上章夫子天道人道之意而
立言也自此以下十二章皆子思子

之言以尺履推明此章之意

○解按此為第三支之首

唯天下至誠為能盡其性能盡其性則能盡人之性能盡

人之性則能盡物之性能盡物之性則可以贊天地之化

育可以贊天地之化育則可以與天地參矣天下至誠謂聖人之德之

實天下莫能加也盡其性者德無不實故無人欲之私而

天命之在我者察之由之巨細精粗無毫髮之不盡也人

物之性亦我之性但以此所賦形氣不同而有異耳能盡之

者謂知之無不明而處之無不當也贊猶助也與天地參

謂與天地並立為三也此自誠而明者之事也。運按萬

物皆備於我故自全其所受之理為盡其性即盡人之性

盡物之性亦盡其性也盡人性如老安少懷舉善教不能

實賢誅惡皆是盡物性如服牛乘馬四靈畜而虎豹驅五

穀藝松栢植而刺榛剪斧斤時皆是各如其貴賤大小善

惡以處之而無不當也化自無而有亦自有而無育則及

之成之也化育者氣氣則不能無過

不及故必賴聖人贊之而得其中

右第二十二章

言天道也。運按此言誠者之仁生安之事也。前以生安為知此又以為

仁者進德以知為先成德以仁為先也安行固由生知出而仁之至至於參天地且舉萬物而仁之

則其知亦不待言矣

其次致曲曲能有誠誠則形形則著著則明明則動動則

變變則化唯天下至誠為能化其次通大賢以下凡誠有未至者而言也致推致也

曲一偏也形者積中而發外著則又加顯矣明則又有光輝發越之盛也動者誠能動物變者物從而變化則有不

知其所以然者蓋人之性無不同而氣則有異故推聖人能舉其性之全體而盡之其次則必自其善端發見之偏

而悉推致之以各造其極也曲無不致則德無不實而形著動變之功自不能已積而至於能化則其至誠之妙亦

不異於聖人矣。運按氣偏而性之理因以偏如知者見之謂之知仁者見之謂之仁是也善端發見之偏如見

子入井而側隱發歔爾蹴爾而羞惡形也始由仁義發見之一端推之以盡其極又由仁義之一德推之以盡四德之全則始而曲終而誠始雖自明而誠終亦自誠而明至於動變化則盡人盡物皆不異生安之聖人矣

右第二十三章

言人道也。運按此言誠之者之仁學利困勉之事也至於能化則亦天道矣

道矣唯天化育唯聖贊之也陳氏曰續費力便是人道續不費力便是天道故下章即以天道言之

至誠之道可以前知國家將興必有禎祥國家將亡必有

妖孽見乎蓍龜動乎四體禍福將至善必先知之不善必

先知之故至誠如神

禎祥者福之兆妖孽者禍之萌蓍所

間如執玉高卑其容俯仰之類凡此皆理之先見者也然唯誠之至極而無一毫私偽留於心目之間者乃能有以

察其幾焉神謂鬼神。運按誠則必形在天為實理在人為實心誠之能動物處即神其幾動即幾也故周子曰誠

無為幾善惡天人一理人幾如此天已應之其必見必動者神之體物而不可遺天機如此聖已知之其必先知者聖心之神與天一也神不可為而誠可為誠如其誠自神如其神

右第二十四章

言天道也。○運按此言誠者之知盡性之仁至誠之體前知之知至誠之

用所謂誠則明也然至誠之明不可學而至誠之誠可學誠如其誠自明如其明也故下章復以人道言之

誠者自成也而道自道也

下道音道凡訓路者上聲行之者去聲後放此○言誠者物之

所以自成而道者人之所當自行也誠以心言本也道以理言用也○運謂誠者天命之性天命流行物與無妄人與動植皆生而無偽所謂自成也順其性之自然則行之自有當然之路但禽獸草木雖有此道而不能自道如牛馬不能自駕黍稷不能自藝必待人道之即人同具此道而知愚賢不肖各有所偏亦不能自盡其道必待聖人修

以道之也。吾生而萬物皆備於我，則自盡其性。盡人之性，盡物之性，皆吾自盡其性之事耳。故成己成物之道，皆吾所當自誠者。物之終始不誠，無物是故。君子誠之為貴。天下之物皆實理之所為，故必得是理然後有是物。所得之理既盡，則是物亦盡而無有矣。故人之心一有不實，則雖有所為，亦如無有。而君子必以誠為貴也。蓋人之心能無不實，乃為有以自成。而道之在我者，亦無不行矣。○運按此節申上道自道之意。言人物皆生而自成，似無待於我之道之矣。而必引為自道者，何蓋天命之誠，物之所以成，其始亦物之所以成，其終而此實理全載於實心。草木禽獸之心不靈，粟人之心多欲，即吾之心一有不實，則耳目手足皆為虛器。子臣弟友皆為虛位，舉凡天下之物皆與吾不相涉。老無以安，少無以懷，草木鳥獸無以成。若舉萬物之皆備於我者，無一物焉是物之受於天者。雖有以成其始，而可以不誠之故，遂無以成其終。惟不知道之當自道，故至此耳。是故君子必以誠之功自道。誠者非自成己而盡人性盡物性皆我所有自道也。

已也所以成物也成已仁也成物知也性之德也合外內

之道也故時措之宜也

誠雖所以成已然既有以自成則自然及物而道亦行於彼矣仁者

體之存則若用之發是皆吾性之固有而無內外之殊既得於已則見於事者以時措之而皆得其宜也○運按言誠之功似專於己而普及成物者何蓋以性分之內萬物備焉誠原非自成已而已也所以成物也故以事言則成已似內成物似外而以道言則率性之謂道吾生有仁即有知由其體之一而言則反身而誠成已屬仁由其用之妙而言則知明處當成物為知而仁知既皆吾性之所固有則又安能分已成物為二道哉故由成已以措之成物而與時偕行自各得其宜也各得其宜所謂知明處當也非知而何

右第二十五章

言人道也○運按此言誠之者之知誠之而已成自盡其性也仁也誠之

而物亦成盡人物之性也亦仁而曰知者非知之明不能處之當也論其始則由明善而後能實其

善自明而誠也。先其種則由成己之仁以為物之知亦自誠而明也。故本節曰誠者而下章亦即以

天道中之

故至誠無息

既無虛假自無間斷。○運按此承上章明誠者所以能成物之故。天命不已聖人亦不已

皆無息也。顏子三月不違則三月之外未必無息也。雖不曰不違復而即此有不善時已息矣。故惟至誠乃無息不

息則久久則微

久常於中也。微則悠遠。悠遠則博厚博厚

則高明

此皆以驗於外者言之。鄭氏所謂至誠之德著於四方者是也。存諸中者既久則驗於外者益悠遠

而無窮矣。悠遠故其積也廣博而深厚博厚故其發也高大而光明。○運按惟悠故遠促迫者必不能長久也。惟博

故厚基德者必不能厚積也。惟高故明居卑者必不能遠照也。亦惟悠故博而高不求小效所施彌博而其體自尊

也。惟久故厚而明不貪近功所積彌厚而博厚所以載物其精愈光也。此就聖人功業氣象言之。

也高明所以覆物也悠久所以成物也

悠久即悠遠兼內外而言之也本以

悠遠致高尊而高厚又悠久也此言聖人與天博厚配地

高明配天悠久無疆此言聖人與天地同體○按自聖人

微言之則功業之出於聖者猶如此者不見而章不動而

變無為而成見猶示也不見而章以配地而言也不動而

○運按地之山川草木形形色色故曰章天之雨陽風雷

故其不見天地之道可一言而盡也其為物不貳則其生

物不測此以下復以天地明至誠無息之功用天地之道

不息而生物之多有莫知其所以然者○運按天一於健

地一於順無有雜也其所以然者○運按天一於健

健故乾之元亨利貞健於行也地惟一於順故坤之元亨利貞順而行也至於貞下起元則天地生物之心不息而生物之功天地之道博也厚也高也明也悠也久也天地之道不測矣

誠一不貳故能各極其功今夫天斯昭昭之多及其無窮也盛而有下文生物之功

日月星辰繫焉萬物覆焉今夫地一撮土之多及其廣厚

載華嶽而不重振河海而不洩萬物載焉今夫山一卷石

之多及其廣大草木生之禽獸居之寶藏興焉今夫水一

勺之多及其不測龍蛟鰲魚鼈生焉貨財殖焉華嶽並去聲卷

平齊○昭昭猶耿耿小明也此指其一處而言之及其無窮蓋舉全體而言也振收也卷區也此四條皆以發明山其不貳不息以致盛大而能生物之意然天地山川貨非由積累而後大讚者不以辭害意可也○運謂天地亦有

稽夫俯陽地積陰天積情地積形日月星辰即以天地之積為積而其間又日星陽月辰陰華嶽河海即以地之積為積而其間又山高陽水阜陰山靜陰水動陽也辰謂十二次周禮豫州其鎮華山雍州其鎮嶽山周東西都之鎮故指詩云維天之命於穆不已蓋曰天之所以為天也於

乎不顯文王之德之純蓋曰文王之所以為文也純亦不

已詩周頌維天之命篇於敷美辭穆深遠也不顯猶言豈不顯也純純一不雜也引此以明至誠無息之意程子曰天道不已文王純於天道亦不已純則無貳無雜不已則無間斷先後○運按此與末章不顯同前言配天配地也以其功業之著見者言之於本體之淵微未及也故於指明之於天曰於穆於文王言不顯蓋自前之極言費者約之以歸於隱以起末章上天之載無聲無臭之意

右第二十六章 言天道也○運按此章言誠者之真誠者知時仁無不顯勇而裕如正惟

不賴勇而裕如所以為大勇譬如千鈞之舉人皆
切切我獨從容以此重任行此遠道久而不息非

神勇
而何

大哉聖人之道

包下文兩節而言○聖人之道誠而已矣
前言君子之道此乃言聖人之道者緊承

純亦不已而言其神贊化其知如神其無息配
天地豈不大哉極贊之以起下待人後行之意洋洋乎發

育萬物峻極於天

峻高大也此言道之
極於至大而無外也優優大哉禮儀三

百威儀三千

優優充足有餘之意禮儀經禮也威儀曲禮
也此言道之入於至小而無間也○運按萬

物之有形有質者多附於地而此發育萬物者其峻且極
於天地之品物流行者大而乾之統天更大也由吉凶軍

賓嘉五禮析之為冠昏朝聘燕享蒐狩禘嘗大目三十五
又析之為冠有三加昏有六禮祭有朝踐饋食諸節則三

百又析之為升降拜稽進退諸文則有三千愈待其人而
析愈微而愈見其妙是禮儀小而威儀更小也

後行

總結上兩節○運安世無聖人萬物未嘗不發育天

原未

絕於人心也但世無聖人則物皆自生自死老無以

安少無以懷鳥驚於林魚亂於水而人無以自別於禽獸

是道之不自行者必待人行也乃行矣而堯舜禹湯文武

周公孔孟其世變各異其道之行者亦迥殊是道行之而

不盡者原未故曰苟不至德至道不凝焉

善不待人也故曰苟不至德至道不凝焉

而言也疑聚也成也○運按有一理之不備不可謂聚一

理之不造其極不可謂成至德知之盡仁之熟而為勇之

人也下文存心所以為仁致知所以為知故君子尊德性

而以如是之大道毅然肩之非大勇而何

而道問學致廣大而盡精微極高明而道中庸溫故而知

新敦厚以崇禮

尊者恭敬奉持之意德性者吾所受於天

矣復時習之也故加厚也尊德性所以存心而極乎道體

之大也道問學所以致知而盡乎道體之細也二者修德

禮記中庸

卷一之二

五

凝道之大端也。不以一毫私意自蔽，不以一毫私欲自累。涵泳乎其所已，知敦篤乎其所已能。此皆存心之屬也。析理則不使有毫釐之差，處事則不使有過不及之謬。理義則日知其所未知，節文則日謹其所未謹。此皆致知之屬也。蓋非存心無以致知，而存心者又不可以不致知。故此五句大小相資，首尾相應。聖賢所示入德之方，莫詳於此。學者宜盡心焉。○運按上一句其綱，下四句其目。德性天之道，問學人之道也。生安之聖，其問學由德性出。學判以下則非道問學，卽無以爲尊德性也。致廣大四句皆道問學之事，而問學中就其囿圖已成者言，卽謂之德性保而有守之尊之事也。就其散殊用力者言，乃謂之問學聚而有之道之事也。蓋人之生也，得於天之謂德，生而具於心之謂性。萬物皆備於我，本自廣大。原無物欲之累，而卑暗焉。用問學自有私意之蔽，而狹小焉。有私欲之累，而卑暗焉。用問學之功，以祛其蔽，滌其汚，則致廣大極高明，正以道問學之外，則問學正以致之極之耳。前日未知而今已知，前日未能而今已知，則由問學來者已成德性，而溫之教之亦所

以尊之矣必廣大而精微乃有所容必高明而中庸始知
所擇必故不忘而新乃得其益必敦不薄而禮乃不徒文
此致知必先存心盡精微而廣大乃不虛道中庸而高明
乃不過知新而故乃不自費崇禮而厚不太慈此存心之
又必致知精微愈見其廣大中庸愈見其高明未知見為
新知之即成故未崇見為禮崇之亦為厚此致知之原屬
存心也知其當保當聚是知實能保之聚之是行又分之
則致廣大盡精微是知極高明道中庸是行溫故知新是
知敦厚崇禮是行而以為存心致知者道問學以日知其
所自自明而誠之車尊德性以無忘其所能誠之者之人
道究與誠者
之天道一也
是故居上不驕為下不倍國有道其言足以
興國無道其默足以容詩曰既明且哲以保其身其此之
謂與興謂興起在位也詩大雅丞民之篇○運謂不暇後
然足以興與道借出足以容與道借藏
明平時何獨其理哲當事又容其幾

禮記 中庸

卷一之二

三

右第二十七章

言人道也。○運按此章言誠之者之

以致知知之事也。以如是之至道而欲以一身凝

且哲焉則亦自誠而明矣。

子曰愚而好自用賤而好自專生乎今之世反古之道如

此者裁及其身者也

以上孔子之言子思引之反復也

非天子不議禮不

制度不考文

此以下子思之言禮親疎貴賤相接之體也。按天子以聖人居上位而

常制作之時者也。非是則當以愚賤自安不可以生今反古也。

今天下車同軌書同文行

同倫

今子思自謂當時也。軌轍迹之度倫次序之體三者皆同言天下一統也。○起下今用之。

雖有其

位苟無其德不敢作禮樂焉雖有其德苟無其位亦不敢

作禮樂焉

鄭氏曰言作禮樂者必聖人在天子之位。此以有位無德形聖人有德無位起下吾從周。

子曰吾說夏禮杞不足徵也吾學殷禮有宋存焉吾學周

禮今用之吾從周

此又引孔子之言杞夏之後徵證也宋殷之後三代之禮孔子皆嘗學之而能

育其意但夏禮既不可考証殷禮雖存又非當世之法惟則禮乃時王之制今日所用孔子既不得位則從周而已

右第二十八章

承上章為下不倍而言亦人道也。通按上言誠者誠之者之合將以孔

子之祖述憲章結之而復申上不倍不驕之義者

見孔子生周之衰值文之弊其禮當議度當制文

當考而孔子又實有制作之德制作之才可以建

天地考三王而不效者特以無位故耳故必如孔

子乃可為不倍之極則所謂君子而時中也

王天下有三重焉其寡過矣乎

呂氏曰三重謂議禮制度考文惟天子得以行之則

國不異政家不殊俗而人得寡過矣。○運按重君子不騙之心視爲重也。勿謂民愚其與知者心與天地鬼神相通勿謂民不肖其與能者理與三王後聖共貫不敢以輕心視之謂惟吾所命莫予違也。若所議所制所考考之三王而猜謬堯之天地而猜桀則民不信從而民之過上實使然也。上焉者雖善無徵無徵不

信不信民弗從下焉者雖善不尊不尊不信不信民弗從上焉者謂時王以前如夏商之禮雖善而皆不可考下焉者謂聖人在下如孔子雖善於禮而不在尊位也。故

君子之道本諸身徵諸庶民考諸三王而不謬建諸天地而不恃質諸鬼神而無疑百世以俟聖人而不惑。此君子指王天

曰首而言其道即議禮制度考文之事也本諸身有其德也徵諸庶民驗其所信從也建立也立於此而參於彼也天地者道也鬼神者造化之迹也百世以俟聖人而不惑所謂聖人復起不易吾言者也。○運按君子修德凝道固

有制作之本矣而其將制作也又必反而本之身謂可爲
民法則否出而驗之民謂果於民信從否偏參之上下古
今果悉協而無遺否其皆善也然後制作焉正以此民心
皆與天地鬼神相通理皆與先王後聖共貫我身不至此
心此理之極卽不足使民信質諸鬼神而無疑知天也百
從此之謂重此之謂不騖也

世以俟聖人而不惑知人也

知天知人知其理也○運按

有形而鬼神無象似俟之質之較難然天者百神之宰天
且不違而况於鬼神乎三王者百世之師殷因夏禮周因
殷禮百世可知也蓋天不變則道不變君子知天命之本
然又知人事之當然其窮理盡性者自人以達天其仁育
義正者又本天以治人則其制作自有當乎天理之正卽乎人心之安矣是故君子動而世爲

天下道行而世爲天下法言而世爲天下則遠之則有望

近之則不厭

動兼言行而言道兼法則而言法法度也則準則也○按動以威儀言卽後章見也動身

之禮行身之度言身之文詩曰在彼無惡在此無射庶幾夙夜以永終

譽君子未有不如此而蚤有譽於天下者也射詩作歌音

振鷲之篇數厭也所謂此者指本指身以下六事而言○

運按彼無惡則遠有望此無射則近不厭永終譽則世道

世法世則也而其所以然者則惟夙夜之中尊德性道問

學以知天而知人也不然不能蚤有况永終乎君子自

不驕也

右第二十九章承上章居上不驕而言亦人道也○

不言者孔子不得位也然已曰考三王而不謬矣

非孔子其孰當之李文貞云有位者得志加乎民

禮度文是也無位者修身見乎世動行言是也容

貌威儀動無非禮處物治事行無非度聲氣辭令

言無非文夫子一言一動為萬世師則亦不待有

禮制度考文之博而百王之禮樂在是矣故必

如孔子乃為不驕之極則也

仲尼祖述堯舜憲章文武上律天時下襲水土祖述者遠宗其道近

章者近守其法律天時者法其自然之運襲水土者因其

一定之理皆兼內外該本末而言也○李氏曰祖述堯舜

所以考三王而不讓上律下襲所以建天地而不悖史氏

曰堯舜文武施之天下民家者皆上律下襲之事運按上

律下襲不分兩事而時如暑宜葛寒宜裘便辟如天地之

是一定之理終則乘夏則葛便是自然之運猶

無不持載無不覆時辟如四時之錯行如日月之代明錯

迭也此言聖人之德○漢按天地大則四時日萬物迭育

月皆小無不覆載之方錯行代明用之行而

而不相害道並行而不相悖小德川流大德敦化此天地

之所以為大也悖猶背也天覆地載萬物並育於其間而

以不害不悖者小德之川流所以並育並行者大德之敷
 化小德者全體之分大德者萬殊之本川流者如川之流
 脉絡分明而往不息也教化者敦厚其化根本甚大而出
 無窮也此言天地之道以見上文取譬之意也。運按萬
 物者道之形道者物之宰萬物之並育即道之並行萬物
 之不害即道之不可悖特萬物可見而道不可見耳所謂體
 物不遺誠之不可揜也天地之大德曰生天地生萬物而
 四時日月為之用是天地大而四時日月小也若以所生
 之萬物視四時日月則四時日月猶天地之大用四時日
 月道而飛潛動植皆物又四時日月大而萬物小矣若以
 並育並行視不害不悖則所以並育並行者由於天地之
 理之一所以不害不悖者由於天地之分之殊大德敦小
 德之化小德自大德而流而
 本之一者大分之殊者小矣。

右第三十章

言天道也。○運按此三支以誠言天下
 之達道五所以行之者三知也仁也勇

也所以行之者一誠也不誠則不成其為知仁勇
 而達道亦無以行矣孔子生知安行而自言十五

志學及七十從心不亂等不間斷且曰發憤忘食樂以忘憂不知若之將至不啻困勉者然以誠者之聖川誠之功使後之困勉學利者皆有所準則故夫天道人道之合未有如孔子者也故言誠而以孔子三結之其下二章又以申此章之義

唯天下至聖為能聰明睿知足以有臨也寬裕溫柔足以有容也發強剛毅足以有執也齊莊中正足以有敬也文

理密察足以有別也

別音必凡分別放此○聰明睿知生知之質臨謂居上而臨下也其下四

者乃仁義禮智之德文章也理條理也密詳細也察明辨也○運按此一節先言小德所性之德渾然而已分之則生知安行為三又分之則仁義禮智為四又分之各得四焉則德也而小矣聰無不聞明無不見睿以知來知以藏往寬量之宏裕神之暇溫陽之舒柔陰之順發奮於始強任於外剛主乎中毅持其終齊心不雜莊容不惰中其

行無過不及正其立不偏文條理畢具理竊密不淆審無毫髮之疎察無疑似之惑大抵每四德皆先淺而後深也

此皆心之用故朱子曰以在表者言之溥博淵泉而時出之溥博周徧而廣

而有本也出發見也言五者之德充積於中而以時發見於外也○運按此一節乃言川流溥謂聰明及寬裕諸德

無所不備博又其所備者根源甚大也淵其源無盡藏泉其本無止息當應當明當寬當裕者隨時出之無往不聰

無往不明無往不寬裕者時時出之也溥博如天淵泉如淵見而民莫不敬

言而民莫不信行而民莫不說言其充積極其盛而發見當其可也○運按言其溥

如天之日月雷電風雨霜露無不備言其博如天之日月

明照四海天之雨露滋潤萬物言其淵如淵之靜深莫窺

其底泉如淵之有本藏於不竭也見容貌威儀言發號施令行接人應務皆其所時出也是以聲名洋

溢乎中國施及蠻貊舟車所至人力所通天之所覆地之

所載日月所照霜露所隊凡有血氣者莫不尊親故曰配
天施去解凡無心自及者故此○舟車所至以下蓋極言
之配天言其德之所及廣大如天也○按言聲名則見
言行所不及也南舉轅北舉貍則東西可知凡有血氣若
貫胸長股踵胛人形不全并不得謂之民也而有血
氣則血陰氣陽且陰陽之氣即
其天地之性故莫不尊親也

右第三十一章

承上章而言小德之川流亦天道也

唯天下至誠為能經綸天下之大經立天下之大本知天

地之化育夫焉有所倚

焉音州凡不然之辭故此○經綸皆帶絲之事經者理其緒而分之

論者比其類而合之也經常也大經者五品之人倫大本者所性之全體也惟聖人之德極誠無妄故於人倫各盡其當然之實而皆可以為天下後世法所謂經綸之也其於所性之全體無一毫人欲之偽以雜之而天下之

變萬化皆由此出所謂立之也其於天地之化有則無其
 極誠無妄者有然契焉非但聞見之知而已此皆至誠無
 妄自然之功用夫豈有所倚著於物而後能哉○運按此
 一節先言教化大經道也大本性也化育天命也至誠之
 經綸由大本出經綸其化大本其敦之者也至誠之立本
 由知化出立本其化知化其敦之者也而天地之化育又
 何自出哉天地之至誠又其敦之者也天地以至誠敦其
 化而化育之命從此出聖人以至誠敦其化而率性之道
 從此出聖人之經綸與天地之化育同功立本與天地同
 體故自無不知也聖人之經綸立本安行聖人之知化生
 知安行由生知出一以貫之自源而流無所倚也若誠之
 之聖人則必由窮理盡性以至於命而有所倚矣故大學
 曰致知 脩脩其仁淵淵其淵浩浩其天 脩脩至親以經
 在格物 脩脩其仁淵淵其淵浩浩其天 脩脩至親以經
 深貌以立本而言也浩浩廣大貌以知化而言也其淵其
 天則非特如之而已○運按此一節乃言大德君臣父子
 道有五而總一仁仁其大德也知仁勇德有三而總出於
 命命其大德也性命各正而總統於乾元天其大德也

苟不固聰明聖知達天德者其孰能知之曰固猶實也鄭氏

聖人也。○運按至誠至聖非二人也。就其德言曰至誠就其有此德者曰至聖。故朱子云此只以表裏言。蓋聖則共見誠則難名。故觀其表則夫人見其如天如淵而民莫不故信。即凡有血氣亦莫不尊親也。觀其裏則其淵其天者非實聰明睿知達仁義禮知之大德不足以知之矣。

右第三十二章

承上章而言大德之教化亦天道也

然至誠之道非至聖不能知。至聖之德非至誠不能為。則亦非二物矣。此篇言聖人天道之極致至此而無以加矣。○運按此二章乃以終費隱之義達道九經費也。所以行之者一隱也。由達道九經皆之至於莫不尊親費之至也。由達道達德而約之至於其孰能知。隱之至也。達道之大原出於天無不誠也。達德之大原出於天無不誠也。然在天無不誠之理而在人有不誠之心。心有不誠則德

非其德而道亦無以自行矣誠者聖人也天也誠
 之而能有誠亦聖人也人而天也能為天下至聖
 之人則必能體天下至誠之道故第一支以唯聖
 者能之終言誠者之能以立誠之者之準也第二
 支以果能此道終言誠之者之能以示所由至於
 誠者之路也第三支以天下至誠為能盡性始誠
 者之能也以曲能有誠端之而極於能化誠之者
 之能一誠者之能也以至聖為能始至誠為能終
 聰明五者誠於德經論大經誠於道唯
 誠者能之唯誠之以至於聖亦能之也

詩曰衣錦尚絅惡其文之著也故君子之道闡然而日章

小人之道的然而日亡君子之道淡而不厭簡而文溫而

理前章言聖人之德極其盛矣此復自下學立心之始言
 之而下文又推之以至其極也詩國風衛碩人那之手

皆作衣錦娶衣聚網同禪衣也尚加也古之學者為已故
 其立心如此尚絅故闡然衣錦故有日章之贊淡簡溫絅

之襲於外也不厭而文且即焉錦之美在中也小人反是則暴於外而無實以繼之是以的然而日亡也○運按君子有爲已之心非徒心也有是心卽有是事實有爲已之功故成此錦以不務外故闕然以實有之故日章所謂誠則形形則著著則明也積而至於篤恭闕然之至而天下平日章之至闕然之至其天其淵人莫能知日章之至如天如淵莫不尊親也此一章之大指下乃詳言之又按中庸君子小人對舉者三爲人小人之始行險小人之習至無忌憚則小人之極爲已君子之心居易君子之知遠之功至時中則君子之成也立志殊而終身迥殊矣

近和風之自知微之顯可與入德矣

遠之近見於彼者由於此也風之自著乎

外者本乎內也微之顯有諸內者形諸外也有爲已之心而又知此三者則知所謹而可入德矣故下文引詩言謹獨之事○運按此乃指其功所由始遠之近天下之本在國國之本在家也風之自家之本在自身身之主在心也微之顯由未發之中而萌於意所謂莫見其顯也故下遂以謹獨之事繼之爲已之心貫乎成德之始終而知幾則人

德之始也。詩云潛雖伏矣亦孔之昭故君子內省不疚無惡

於志君子之所不可及者其唯人之所不見乎。昭詩作灼。詩小雅。

正月之篇承上文言莫見乎隱莫顯乎微也。賦詩小雅。獨

之事也。○運按欲誠其意先致其知知所先後則近道矣。

未有不不知幾而能謹幾者知微之顯其知幾也內省不疚

其謹幾也入德之功由知幾而始為己之事以慎獨為先。詩云相在爾室尚不愧於屋

漏故君子不動而敬不言而信。相去聲凡相視相助俱放

也屋漏室西北隅也承上文又言君子之戒謹恐懼無時

不然不待言明而後敬信則其為己之功益加密矣故下

文引詩并言其效。○首章本天命而下及人功故先以戒

懼統其全後以慎獨提其要此章從下學而上達天命故

先以慎獨提其要後以敬信統其全學至詩曰奏假無言

無往不敬則意誠而心正身修舉統之矣。詩曰奏假無言

時靡有爭是故君子不賞而民勸不怒而民威於鈇鉞

詩商頌烈祖之篇奏進也承上文

作威儀格同鈇音夫○詩商頌烈祖之際極其誠敬無有自

而遂及其效言進而威格於神明之際極其誠敬無有自

說而人自化之也威畏也鈇斧斫刀也鈇斧詩曰不顯惟

也○運按已敬信而人自化所謂風之自也詩曰不顯惟

德百辟其刑之是故君子篤恭而天下平

詩周頌烈文之

不顯此借以為幽深乎遠之意承上文言天子有不顯之

德而諸侯法之則其德愈深而效愈遠矣篤厚也篤恭言

不顯其敬也篤恭而天下平乃聖人至德淵微自然之

中庸之極功也○運按內省敬信皆恭也篤恭者自慎一

日用言動之敬信以至於不言動而亦敬信馴至無所用

敬而自無不敬焉則敬身以敬家敬家以敬國而天下自

平所謂遠

之近也

化民成俗詩曰德輶如毛毛猶有倫上天之載無聲無臭

中庸 卷一之二

至矣。謂不顯之德者，正以其不大聲與色也。又引孔子之言，以為絳色乃化民之末務，今但言不大之而已，則猶有聲色者存，是未足以形容不顯之妙，不若蒸民之詩所言，德如毛則庶乎可以形容矣。而又自以為謂之毛則猶有可比者，是亦未盡其妙，不若文王之詩所言上天之載，無聲無臭，然後乃為不顯之至耳。蓋聲臭有氣無形在物，最為微妙，而猶曰無之，故推此可以形容不顯篤恭之外，非此德之外，又別有是三者，然後為至也。○李氏曰：無聲無臭，非窈冥昏默之謂，蓋天命之體純粹以精，其心則普萬物而無心，其用則利天下而不言，淡然無聲臭之可窺。此天德之所以為至誠而達乎天德者，於是為至也。

右第三十三章

子思因前章極致之言，反求其本，復自下學為己，謹獨之事，推而言之，以

馴致乎篤恭而天下平之盛，又贊其妙，至於無聲無臭而後已焉。蓋舉一篇之要而約言之，其反覆

丁寧示人之意至深切矣。讀者其可不盡心乎。○愚按此章與第一章相應，該一部中庸在內，俟

謂再序人德成德之叙者得之運謂天命之性自
 天而之於人者也上天之載盡人以復乎天者也
 首章即言聖神功化之極見非是不足為學之成
 所以立其極大學所謂知止也未章復言下學為
 已之始見非是不足立學之基所以端其本大學
 所謂知本也首章由天以及人先戒懼而後慎獨
 由全由以指其要末章盡人以合天先內省而後
 敬信由其要以進於全也由實怒至不實怒而民
 勸民威則和之至由敬信至篤恭則中之至首章
 先中後和自體而達用所謂顯諸仁也未章先和
 後中無用之非體所謂藏諸用也李氏曰此與首
 章相為首尾而總括全篇蓋首章論體道之要而
 且不昧不問曰懸微惟本於未發之初求端於方
 動之際皆所謂不見是罽自証而自修非人所能
 與所以然者天命之性其本體原若是也是以學
 問之事低則炫於外或則一於中炫於外則表暴
 而有成於中則收斂而無形自立心之始而至
 於盛德之下雖淺深高下不同而其心則一故聖

人不顯之妙與天合德而方其間然淡簡即無聲
 無臭之體而達於天德之基也此書以中庸名篇
 者此理原於性命行於道教惟其誠實而無妄是
 以至中而至常學道者以真實無妄之心求之則
 內無隱怪之慕外無功利之貪漢泊平常無聲色
 臭味之可娛然後可以明庶物察人倫而返乎性
 命之真矣故無聲無臭者
 微妙之至即中庸之極也

禮記卷一之二 終

門人德 保校

乾隆歲次癸巳

門下晚學耿毓孝校錄